

DI'IDZA' TABELAO TA UDIXOGUE' JESUCRISTO SAN JUAN APÓSTOL

Di'idza' tabelao ta udixogue'
Jesucristo San Juan apóstol

1 Lëdi'idza' niga nacan di'idza' tabelao ta gudyi Diuzi Jesucristo tacuenda quixogue'në' ja ben' nao xnezë' ta inezijë' cabë' baza' gaca dza zaza'ra. Use'ela' Jesucristo tu ángel ta gacalënë' në'ëdi' ta inezida' në'ëdi', Juan, naca' ben' nao xneza Cristo. ²Tali rnia' cabë' blë'ëda'. Naca' testigo nacan tali con cabë' rna xti'idza' Diuzi. Naca' testigo nacan tali con cabë' una Cristo.

³Huela'iya Diuzi huaca huen gula quie nu ben' rulaba di'idza' lë'ë guichi ni, nu ben' ruzënaga con cabë' rnan. Lëscan' huela'iya Diuzi huaca huen gula quie nu ben' rue quie cabë' rnën lë'ë guichi ni, como dan' baidyin dza gaca con cabë' rnën lë'ë guichi ni.

Use'ela' Juan guichi ni
lao gadyi ciudad

⁴Në'ëdi', Juan, bia' guichi niga use'ela'n lao le'e, ben' nao xneza Cristo lao gadyi ciudad ga nita'le yu nebaba Asia. Rnaba' lao Diuzi, ben' zu tuzioli, ta huela'iyänë'

le'e tacuenda su laxta'ole gusto bidëbile. Lëscan' lena' rnaba' lao ben' naca ca gadyi bichi be, ben' zu zaca'lao lao Diuzi ga naca xlatonë'. ⁵Lëscan' lena' rnaba' lao Jesucristo, ben' naca testigo dya'a quie Diuzi. Naquë' ben' nëro, ben' pseban Diuzi para tuzioli. Lëbë' rnabë'në' yugulu ben' naca rey, ben' nita' lao yedyi layu. Nedyë'ë Cristo ra'ou udubanë' dula' xquia quiero cati ulato ren quienë' gutinë' lë'ë yaga cruzo. ⁶Ulionë' ra'ou nacaro rey, nacaro pxuzi ta huero ca mandado re'en Xuzinë' Diuzi huero. Ben' bala'ana naquë' tuzioli. Ben' napa yela' rnabë' naquë' tuzioli. Amén.

⁷Uzë nagale quia' dyë'ëdi. Baidyin dza guida Cristo lao beo. Hualë'ë yugulu benë' lëbë'. Hasta ben' psaca lëbë' bizinaquezi hualë'ëjë' lëbë'. Huabedyi yugulu ben' nita' lao yedyi layu cati ilë'ëjë' lëbë'. Nacan tali can' gaca.

⁸Na'ra una Diuzi: “Lao na'a uzulaohua' ulëcha' yedyi layu. Lëscan' lao na'a yeyudyi yedu quie yedyi layu. Naca' ca quie letra A len letra Z quie abecedario.” Cana' una Diuzi, ben' de yugulu yela' rnabë' quie, ben' zu tuzioli.

Blu'e Bichi Be quie Diuzi**Juan ca naca Cristo**

⁹Në'ëdi', Juan, naca' ben' bichile, ben' nao xneza Jesús. Nacalia' le'e tuže nun quie redzagalaoro naoro xneza Cristo. Lëscan' nacalia' le'e tuže nun quie dan' nacaro ben' nao quie yela' r nabë' quie Diuzi. Lëscan' nacalia' le'e tuže nun quie racalë Jesucristo ra'o ta suero dyë'ëdi. Na'ra guca' preso dza na' ga de yu bidyi lu'u nisadao' laona Patmos nun quie dan' uidxogui'a benë' xti'idza' Diuzi guchal'jë' cabë' bë Jesucristo. ¹⁰Na'ra cani guca quia' tu dza quie Señor quiero. Guca quia' blu'e Bichi Be quie Diuzi në'ëdi' cabë' baza' gaca dza zaza'ra. Beda' zidzo gula unë tu benë' xcu'udza'. Como ca rchi' trompeta unënë'. ¹¹Na'ra una ben' na' rëbinë' në'ëdi': —Lao na'a uzulaohua' ulëcha' yedyi layu. Lëscan' lao na'a yeyudyi yedu quie yedyi layu. Naca' ca quie letra A len letra Z quie abecedario. Cabë' ilë'ëlo' ni, uzulo' di'idza' lë'ë guichi, huelo' tu libro ise'elo'n lao gadyi ciudad ga nita' ben' nao xneza' yu nebaba Asia. Ise'elo'n lao ciudad Efeso, len lao ciudad Esmirna, len lao ciudad Pérgamo, len lao ciudad Tiatira, len lao ciudad Sardis, len lao ciudad Filadelfia, len lao ciudad Laodicea. ¹²Na'ra beyëchoga' una'a blë'ëda' nuži ben' unë në'ëdi'. Na'ra cati beyëchoga', una'a blë'ëda' gadyi candelero de oro. ¹³Lao tao' candelero na', blë'ëda' tu ben' naca ca be'mbyu. Naconë' tu la'ari' tona zun xcu'udzu labatenë'. Na'ra ru'achu'u la'ari' naconë', yu'un

tu cinta ta naca de oro. ¹⁴Na'ra guitza' guichonë' nacan ta bezëri cabë' naca žaba beco' ži'ila' bezëri, lëscan' cabë' naca yelo bezëri. Na' rna' yulaonë' ca rna' xni' gui'. ¹⁵Lëscan' labanë' rna'n raca titi' cabë' rna' gu'ba bronce yëri gula ta bro lao gui'. Lëscan' rchi'në' rnan zidzo gula ca rchi' tu yao že gula. ¹⁶Na'ra zënë' gadyi bélo na'anë' zaquë' yebë. Lëscan' bro tu ta naca ca quie tu espada neduchi'n rupala'n lu'u ru'anë'. Lëscan' rna' laonë' cabë' rna' lao ubidza raca titi' cati rna' oba fuerte gula.

¹⁷Na'ra cati blë'ëda' cana', byala' xni'anë' guca quia' ca quie ben' baguti. Pero lëbë' bda'në' na'anë' yebë në'ëdi'. Na'ra unë' në'ëdi': —Bidzebo'. Lao na'a uzulaohua' ulëcha' yedyi layu. Lëscan' lao na'a yeyudyi yedu quie yedyi layu. ¹⁸Naca' ben' de yela' neban quie tuzioli. Ba'ala'cazi agutia', pero beban'a' zua' tuzioli. Në'ëdi' rnabi'a lao yela' guti len lao gui' gabila. ¹⁹Na'ra bzu di'idza' lë'ë guichi cabë' bablë'ëlo'. Lëscan' bzu di'idza' cabë' rlë'ëlo' raca na'a, len cabë' ilë'ëlo' baza' gaca. ²⁰Na'ra cani naca di'idza' ta rguixogue'n quie gadyi bélo zia' zaquë' na'a yebë ta bablë'ëlo'. Lëscan' cani naca di'idza' ta rguixogue'n quie gadyi candelero de oro ta bablë'ëlo'. Na'ra quie gadyi bélo, leyacan rguixogue'n quie gadyi ben' quixogue' xti'idza' Diuzi lao gadyi ciudad ga nita' ben' nao xneza'. Lëscan' quie gadyi candelero, leyacan rguixogue'n quie gadyi ciudad na'.

Use'ela' Juan di'idza' lao
gadyi ciudad: Di'idza' niga
use'ela'në' lao ciudad Efeso

2 Na'ra una Jesús gudyinë' në'ëdi':
—Bzu di'idza' niga lë'ë guichi
ise'elo'n lao ben' nao xneza', ben'
zu rguixogue' xti'idza' Diuzi ciudad
Efeso. Na' yëbo'jë': “Cani rna ben'
zë gadyi bélo zaque' na'anë' yebë,
ben' rda lao tao' candelero na':
²Nezda' yugulu cabë' ruele. Nezda'
cabë' ruele dyin quia' du guicho du
la'adyi'le. Nezda' biusanla'adyi'le
huele dyin quia'. Nezda' bihue'le
lato gacalë ben' mala le'e tuže.
Nezda' bële prueba quie ben' na
nacajë' apóstol, pero bë' nazijë'
binacajë' apóstol. Nezda' banezile
ben' huizi' yë' nacajë'. ³Nezda' cabë'
ruele rnaole xneza' dyë'ëdi. Nezda'
lega bedzagalaole tanun quie dan'
naole xneza'. Nezda' bële dyin quia'
biruhuëdile. ⁴Pero de tu ta ruele
biraxeda'. Bira nedyë'ële në'ëdi'
cabë' bdyë'ële në'ëdi' dza na', dza
uzulaole inaole xneza'. ⁵Quie lena'
reya'ala' yeza'la'adyi'le cabë' bële
dza na'. Reya'ala' yetza'le pensari
quiele huele tatula cabë' bële dza
na'. Chi bihuele ca nia', laguidatia'
huaguba' le'e ga zule, bira gacale ca
quie candelero quia' chi biyetza'le
pensari quiele. ⁶Pero tahuen na'
cabë' pensari ruele rudiele ca rue
ja ben' nicolaítas, ben' rionla'adyi'
yaca ídolo. Lëscan' në'ëdi', rudieda'
cabë' ruejë'. ⁷Ulezënaga dyë'ëdi
cabë' na Bichi Be quie Diuzi rëbinë'
yaca ben' nao xneza'. Nu yaca ben'
sue biusanla'adyi' xneza', huayojë'
guibá ta gaojë' tažixi ta dya tu

yaga ta zu na'. Lëtažixi na' ru'en
yela' neban.” —Cana' una Jesús dza
na'.

Di'idza' niga use'ela' Juan
lao ciudad Esmirna

⁸Na'ra una Jesús gudyinë' në'ëdi':
—Lëscan' bzu di'idza' niga lë'ë
guichi ta ise'elo'n lao ben' rguixogue'
xti'idza' Diuzi, ben' zu ciudad Esmirna.
Na' yëbo'jë': “Cani na ben' una lao
në'ë uzulao cuëchi yedyi layu, ben'
una lao në'ë yeyudyi yedu quie yedyi
layu, ben' baguti beban, ben' bazu
tuzioli: ⁹Banezda' yugulu cabë' ruele.
Banezda' cabë' redzagalaole. Banezda'
nacale ben' yëchi', pero huadyin
dza gacale ben' uña'a como dan'
huaguizu Diuzi le'e quie dyin quienë'
ruele. Banezda' cabë' rudie ja benë'
le'e, ben' na nacajë' ben' Israel, pero
nacajë' ben' nao rue cabë' mandado
rue Satanás. ¹⁰Na'ra biidzebile
cabë' baza' gaca quiele yedzagalaole.
Biidzebile ba'ala'cazi dyin quie xan'
taxi'ibi' baza' gaca quiele udze' ja
benë' bala le'e lu'u dyiguiba cuenda
gacale prueba chi tali naole xneza'
biusanla'adyi'len. Na'ra baba dzazi
baza' yedzagalaole. Pero suele dyë'ëdi
inaole xneza' ba'ala'cazi guti ja benë'
le'e. Na'ra guna' yela' neban quiele
tuzioli. ¹¹Ulezënaga dyë'ëdi cabë'
na Bichi Be quie Diuzi rëbinë' yaca
ben' nao xneza'. Nu yaca ben' sue
biusanla'adyi' xneza', bibi tamala gaca
quiejë', ude beyudyi gutijë', bitziojë'
lao gui' gabila.” —Cana' una Jesús
dza na'.

Di'idza' niga use'ela' Juan
lao ciudad Pérgamo

¹²Na'ra una Jesús gudyinë' në'ëdi':

—Na'ra bzu di'idza' niga lë'ë guichi ise'elo'n lao ben' rguixogue' xti'idza' Diuzi, ben' zu ciudad Pérgamo. Na' yëbo'në': "Cani rna ben' zë espada neduchi' rupalao: ¹³Në'ëdi' nezda' yugulu ca ruele. Nezda' zule ciudad ga lega nao ja benë' ca mandado rue Satanás. Pero ba'ala'cazi zule ciudad na', birusanla'adyi'le inaole xneza'. Bipsanla'adyi'le inaole xneza' la'acazi bëti ja benë' Antipas, ben' naca testigo quia'. Bëtijë' lëbë' yedyi quiele ga rnabë' Satanás. ¹⁴Pero de tu ta ruele biraxeda'. Biraxeda' ru'ele lato cabë' rue ben' zu ladole, ben' nenao nerue cabë' consejo bdze' tu ben' lao Balaam len itu ben' lao Balac dza na'. Bdze'në' Balac consejo ta yëbinë' ben' Israel ta gaojë' bë'ëla' ta bdyia ja ben' lao ru'aba ga zu ídolo. Lëscan' bdze'në' Balac consejo ta yëbinë' ben' Israel ta huejë' tamala gatilëjë' nigula tula, nigula binaca žgulajë'. ¹⁵Lëscan' biraxeda' ru'ele lato cabë' rue ben' zu ladole, ben' nenao nerue cabë' consejo rudze' ben' nicolaítas. Pero rudieda' cabë' consejo rudze'jë' leyaquë'. ¹⁶Quie lena' ruen dyabë' yetza'le pensari quiele, como dan' chi biyetza'le pensari quiele, laguidatia' ga zule tilalia' lëjë' conlë espada ta rero ru'a. ¹⁷Ulezënaga dyë'ëdi cabë' na Bichi Be quie Diuzi rëbinë' yaca ben' nao xneza'. Nu yaca ben' sue biusanla'adyi' xneza', hua'jë' yëta xtila laona maná ta gaojë', pero yëta xtila ta negachi'n na'. Lëscan' hua'jë' tu huio yo bezëri quie quiejë'. Na' lë'ë yo na' zun tu laojë' cubi ta binezi ja ben' tula. Tuzi ben'

si' len nezinë' nu laohue zun." — Cana' una Jesús dza na'.

**Di'idza' ni use'ela' Juan
lao ciudad Tiatira**

¹⁸Na'ra una Jesús gudyinë' në'ëdi':

—Na'ra bzu di'idza' niga lë'ë guichi ise'elo'n lao ben' zu rguixogue' xti'idza' Diuzi ciudad Tiatira. Na' yëbo'në': "Cani rna ben' naca ži'i Diuzi, ben' yu'u laohue ca yu'u xni' gui', ben' rna' labe ca rna' guibá bronce yëri gula: ¹⁹Na'ra nezda' yugulu cabë' ruele. Nezda' cabë' nedyë'ële në'ëdi'. Nezda' cabë' rnaole xneza'. Nezda' ruele cabë' mandado re'enda' huele. Nezda' rzuele birusanla'adyi'le inaole xneza'. Nezda' arnaorale xneza' dya'ara ca dza uzulaole inaole xneza'. ²⁰Pero de tu ta ruele biraxeda'. Biraxeda' ru'ele lato zu tu nigula, ben' lao Jezabel, ladole. Rnanë' nun quie Diuzi rnanë', pero yë'zi rzi'në', como dan' rudze'në' ja ben' nao xneza' consejo ta huejë' tamala. Rudze'në' lëjë' consejo ta gasilëjë' yaca nigula binaca žgulajë'. Lëscan' rudze'në' lëjë' consejo gaojë' bë'ëla' ta bdyia ja benë' lao ru'aba ga zu ídolo. ²¹Na'ra në'ëdi' abi'anë' lato ta yetza'në' pensari quienë', pero bire'ennë' usanla'adyi'në' tamala quienë' rasilë'në' con nutezi be'mbyu. ²²Pero në'ëdi' hua'në' castigo gaca žhue'në' gatanë' lao cama na'. Lëscan' hua' castigo ja ben' ruelë lëbë' tamala chi biusanla'adyi'jë' cabë' tamala ruelëjë' lëbë'. ²³Na'ra cati gutia' ja ben' nao nigula na', caora na' huanezi yugulu ben'

nao xneza' de que nezda' dužete ca naca pensari yu'u lu'u guicho laxta'o benë'. Caora na' guna' le'e tu premio chi bële tahuen, pero hua' le'e tu castigo chi bële tamala. ²⁴Pero le'e, ben' nao xneza', ben' zu ciudad Tiatira, le'e ben' binao birue cabë' consejo rudze' nigula na', le'e ben' binezi cabë' di'idza' rnajë', rnajë' di'idza' negachi' quie Satanás, na' në'ëdi' rnia' le'e, tuzi ca re'enda' huele, re'enda' inaole xneza'. ²⁵Huele seguir inaole xneza' dyë'ëdi hasta dza cati yeguida'. ²⁶Na'ra quie ben' rzue birusanla'adyi' xneza', quie ben' rue ca mandado re'enda' huejë' hasta dza gatijë', hual'jë' lato inabë'jë' lao yedyi layu. ²⁷Cabë' lato bën Xuza' në'ëdi' rnabi'a, cana' hual'jë' lato inabë'jë'. Conlë tu xaga' de guíba inabë'jë' lao yedyi layu. Chi tilalë ja benë' lëjë', udyiagui' yaca ben' nao xneza' lëjë' užužuyaquë' lëjë' como si fuera nacajë' yeso' yu. ²⁸Hual'jë' lato sulëjë' në'ëdi', ben' naca ca bélo quie bala. ²⁹Ulezënaga dyë'ëdi cabë' na Bichi Be quie Diuzi rëbinë' yaca ben' nao xneza'." —Cana' una Jesús dza na'.

**Di'idza' niga use'ela' Juan
lao ciudad Sardis**

3 Na'ra una Jesús gudyinë' në'ëdi':

—Na'ra bzu di'idza' niga lë'ë guichi ise'elo'n lao ben' rguixogue' xti'idza' Diuzi, ben' zu ciudad Sardis. Na' yëbo'jë': "Cani rna ben' yu'u Bichi Be quie Diuzi naca ca gadyi bichi be, ben' zë gadyi bélo: Nezda' yugulu cabë' ruele. Nezda' binaca huen quiele, naca quiele

ca quie ben' baguti ba'ala'cazi nezule nebanle. ²Ulehue pensari cabë' raca quiele. Gapale cuidado biusanla'adyi'le ca tu tadao' bicu' rnaole xneza'. Pues ilë'ëti'zi bipsanla'adyi'le xneza'. Blë'ëda' cabë' naole xneza', binegaolen dya'a cabë' re'enda'. ³Na'ra bigala'adyi'le cabë' bë quiele quie xti'idza' Diuzi dza na'. Reya'ala' inaole dyë'ëdi hue quiele quie xti'idza' Diuzi tatula. Reya'ala' utza'le pensari quiele, como dan' chi bihue quiele cabë' rnia' le'e, na'ra guida' binezile bi hora idechugulia' quiele. Cabë' guida ben' uban, binezile bi hora guidë', cana' guida'. ⁴Pero zu bala ben' zu ladole ciudad Sardis, ben' binaca žabajë' besu, ta inaro, tuzi xneza' rnaojë'. Na'ra hual'jë' la'ari' bezëri ta gacojë', huazulia' lëjë' tuže, como dan' cana' zaca'jë' gaca quiejë'. ⁵Nu yaca ben' rzue biusanla'adyi' xneza', hual'jë' la'ari' bezëri ta gacojë', biusula' laojë' zu lë'ë guichi naca libro ga naca lista bi lao ben' gata' yela' neban quie tuzioli. Huëpa' Xuza' len yaca ángel quienë': "Ben' ni nacajë' ben' quia'." ⁶Ulezënaga dyë'ëdi cabë' na Bichi Be quie Diuzi rëbinë' yaca ben' nao xneza'." —Cana' una Jesús dza na'.

**Di'idza' niga use'ela' Juan
lao ciudad Filadelfia**

⁷Na'ra una Jesús gudyinë' në'ëdi': —Na'ra bzu di'idza' niga lë'ë guichi ise'elo'n lao ben' rguixogue' xti'idza' Diuzi, ben' zu ciudad Filadelfia. Na' yëbo'jë': "Cani rna ben' naca la'iya, ben' rnë tali, ben' rnabë' lao ciudad quie rey David, ben' rsalo puerta nunu saque'

usio len, ben' rsio puerta nunu saque' isalo len: ⁸Nezda' yugulu cabè' ruele. Para le'e apsaloga' puerta quie guibá, nunu saque' usio len. Cana' bia' quiele como dan' rnaole xneza', rue quiele quie xti'idza', birusebi'le nē'ēdi'. ⁹Cani hua' quiele: Ulaohua' yaca ben' nao xneza Satanás, ben' huizi' yē', ben' na nacajē' ben' Israel, pero binaojē' xneza'. Hua' mandado quitzujē' žibijē' laole ta inezijē' nedyē'ēda' le'e. ¹⁰Lēscan', como dan' rue quiele quie xti'idza', rzuele bipsanla'adyi'le xneza', quie lena' ucuasa ucu'oga' le'e dza zaza'ra cati gaca tazēdi gula lao dužete yedyi layu. Na' gaca tazēdi gula lao yedyi layu ta ulu'en quie yaca ben' nita' na' cabē' ben' mala nacajē'. ¹¹Laguidatia'. Quie lena' biusanla'adyi'le cabē' babēle naole xneza' cuenda bigaca quiele bigata' premio quiele guibá. ¹²Nu yaca ben' hue gan lao tamala, hua'jē' fuerza valor cuenda gaca quiejē' ca quie tu pilare zu lu'u yu'u quie Xuza'. Na' huega'njē' lu'u yu'u na' tuzioli. Uza' lē'ē laxta'ojē' laohua', len lao Xuza', len lao ciudad quienē', ciudad Jerusalén cubi yeyēzi guibá yedyinnan lao yedyi layu. ¹³Ulezēnaga dyē'ēdi cabē' na Bichi Be quie Diuzi rēbinē' yaca ben' nao xneza'." —Cana' una Jesús dza na'.

**Di'idza' niga use'ela' Juan
lao ciudad Laodicea**

¹⁴Na'ra una Jesús gudyinē' nē'ēdi':
—Bzu di'idza' niga lē'ē guichi
ise'elo'n lao ben' rguixogue' xti'idza'
Diuzi, ben' zu ciudad Laodicea. Na'
yēbol'jē': "Cani rna ben' rna puro

tali, ben' naca testigo dya'a, ben' birzi' yē', ben' zulē Diuzi tuže cati uzulao Diuzi bzaloguē' yugulu ta de: ¹⁵Nezda' yugulu ca ruele. Nezda' nica naole xneza' du guicho du la'adyi'le, nica rusebi'le nē'ēdi'. Chi bire'enle inaole xneza' du guicho du la'adyi'le, mejorla usebi'le nē'ēdi'. ¹⁶Pero como binaole xneza' du guicho du la'adyi'le, lena' bizua' gusto cabē' ruele. ¹⁷Na'ra nale nacale ben' uña'a. Nale raca huen quiele. Nale lega raxe Diuzi ca ruele. Nale gabi rdzioguele. Pero nica nezile ca tamala raca quiele. Nica nezile araca quiele ca quie ben' yēchi', ca quie ben' laochula, ca quie ben' rda žan guidi. ¹⁸Quie lena' guna' le'e tu consejo. Reya'ala' inabale nē'ēdi' chi biguti'a quiele ta naca puro oro cuenda gacale dugalo ben' uña'a. Reya'ala' inabale nē'ēdi' chi biguti'a quiele la'ari' bezēri ta gacole cuenda ucachi'n cuerpo quiele, na' bigaca yela' stu' quiele. Reya'ala' inabale nē'ēdi' chi biguti'a quiele huento ta udze'le yulaole cuenda yelē'ēle. ¹⁹Rdila' ruegadya' yugu ben' nedyē'ēda'. Quie lena' reya'ala' inaole xneza' du guicho du la'adyi'le. Reya'ala' utza'le pensari quiele uzēnagale quia'. ²⁰Naca quia' ca quie tu ben' zē ru'a yu'u, ben' rulidza le'e. Chi nu ben' be quia' inanē' nē'ēdi': Uda lu'u yu'u, caora na' tzu'a lu'u yu'u quienē' gaolia'nē' tuže, na' gaolēnē' nē'ēdi' tuže. ²¹Nu ben' hue gan lao tamala, hua'nē' lato cue'lēnē' nē'ēdi' cuēta' ga ri'a xlatoga'. Cana' hua' quienē' con cabē' bia' nē'ēdi', bia' gan lao tamala, ben' Xuza' nē'ēdi' lato cui'a cuēta'nē' ga re'nē' xlatonē'.

²²Ulezënaga dyè'èdi cabè' na Bichi Be quie Diuzi rëbinè' yaca ben' nao zneza'." —Cana' una Jesús dza na'.

Cabè' rionla'adyi'jè' Diuzi guibá

4 Na'ra ude beyudyi cana', blè'èda' neyalo puerta guibá beda' unè ben' unè nè'èdi' tanéro, ben' yu'u rchi' ca yu'u rchi' trompeta. Na'ra unanè' nè'èdi' caniga:

—Uyèpicara niga. Ulu'ena' luè' cabè' ta baza' gaca.

²Cana' bë Bichi Be quie Diuzi blu'enè' nè'èdi' ta baza' gaca. Na'ra blè'èda' ga cue' tu benè' ta zu guibá. Lëscan' blè'èda' re' tu benè' laonan. ³Lëben' na', ben' re' laonan, raca titi'nè' ca raca titi' yo jaspe o ca raca titi' yo cornalina. Lëscan' blè'èda' ru'alao ga re'nè', neyèchon byeta' ta raca titi'n ca raca titi' yo esmeralda. ⁴Lëscan' blè'èda' ru'alao ga re' ben' na', zura igalobetapa ga cue'ra benè'. Blè'èda' na' ure' galobetapa ben' gula, ben' rñabè'ja. Lëben' na' nacojè' la'ari' bezèri, yu'u coron de oro guichojè'. ⁵Ga re' ben' na', rguino rëpiyesa, ratzo bdyito huiziu'. Na' zaca'lao ga re' ben' na', zu gadyi lámpara ra'ala'n gui'. Lèlámpara na' nacan bichi be quie Diuzi ta naca gadyi. ⁶Zaca'lao ga re' ben' na', blè'èda' tu ta naca ca nisadao', pero rna'n ca yaohuan yení' gula.

Lëscan' blè'èda' lao tao' tu la'a huio, zaca' ga re' ben' na', zu tapa ben' naca forma ca bia guixi'. Na' yu'u yulaojè' dužetèjè' xcu'udzujè' len laojè'. ⁷Na'ra blè'èda' ben' néro, naquè' ca tu bëdyi guixi', na' ben' urupe, naquè' ca tu bëdyihuaga,

na' ben' uyune, zu laohuè' ca zu lao benè', na' ben' udape, naquè' ca psia bia rzè. ⁸Blè'èda' zu tzona huio xilajè' tzala' tzalajè'. Lëscan' dyia yulaojè' dužete xilajè' rupala'n. Na'ra du dza, du yela, birusanjè' rñajè' cani:

Ben' la'iya naco', ben' la'iya naco', ben' la'iya naco'.

Naco' Diuzi, ben' de yugulute yela' rñabè' quie, ben' zu tuzioli.

⁹Na'ra cati rapala'njè' ben' re' lao xlatogue, ben' neban tuzioli, ¹⁰caora na' uditzu žibi galobetapa ben' gula, ben' rñabè'ja, lao ben' re' na'. Cana' rionla'adyi'jè' ben' neban tuzioli. Lëscan' blè'èda' bdyiajè' coron quiejè' lao xlato ben' na'. Na'ra unajè' rëbijè' lëbè' cani:

¹¹Señor, luè' naco' Diuzi quiendo'.

Luè' zaca'lo' hue ja benè' luè' ben' že.

Luè' zaca'lo' hue ja benè' luè' ben' bala'ana.

Luè' zaca'lo' hue ja benè' luè' ben' de yela' rñabè' quie.

Cana' zaca'lo', como dan' luè' bëlo' yugulute ta de.

Lao na'alo' bzalo'yacan.

Ni rnan quie tu libro len tu ben' naca ca quie tu beco' ži'ila'

5 Na'ra blè'èda' ben' re' xlatogue zënè' tu libro zaquè' na'anè' yebè. Blè'èda' naca libro forma ca rollo. Yu'u letra laonan len xcu'udzun. Blè'èda' gadyi cue' nerioranan. ²Lëscan' blè'èda' tu ángel, ben' de yela' rñabè' quie. Blè'èda' unènè' zidzo unanè' cani: —¿Nu ben' zaca' ta ichipa ta nerio libro na' ta ixèdyinèn'n?

³Na' blè'èda' ganu ben' zu, ben' zaca' ixèdyi libro na', ni ta ulabanè'n bisaque'. Blè'èda' ganu ben' rdzele, ni guibá, ni yedyi layu, ni ga yu'u ben' huati. ⁴Na'ra uredyitzaya'a nun quie dan' ganu ben' nedzele zaca' ixèdyi libro na', ni ta ulabanè'n bisaque'. ⁵Na'ra unè tu ben' gula, ben' rnabè', unanè' nè'èdi' caniga:

—Bira cuedyo' como dan' bazaca' Jesús, ben' naca ben' rnabè' quie familia quie Judá, ben' naca ži'isuba rey David, bazaca'nè' ichipanè' gadyi cue' ta nerio libro ixèdyinè'n.

⁶Lao tao' ga re' ben' na' xlatogue, ga zu tapa ben' naca ca forma bia guixi', len galobetapa ben' gula, ben' rnabè'ja, na' blè'èda' Jesús, ben' naca ca quie beco' ži'ila'. Zènè' na' ba'ala'cazi naquè' hue' nun quie bèti ja benè' lèbè'. Na' blè'èda' dyia gadyi luzu beco' ži'ila'. Lèscan' yu'u gadyi yulaoba'. Na'ra naca gadyi yulaoba' ca gadyi bichi be quie Diuzi ta use'elè' dužete yedyi layu.

⁷Lèscan' blè'èda' uyo lèben' naca ca quie beco' ži'ila' na', yexi'nè' libro zè ben' re' xlatogue na' zaquè' na'anè' yebè. ⁸Cati baoži' ben' naca ca quie beco' ži'ila' libro na', na'ra uditzu žibi tapa ben' naca forma ca bia guixi', len galobetapa ja ben' gula, ben' rnabè'ja, lao ben' naca ca quie beco' ži'ila'. Na'ra ja ben' gula, ben' rnabè'ja na', zèjè' tu huio arpa, zèjè' tu huio copa de oro yu'un yalo. Naca yalo na' ca quie di'idza' ru'elè' yaca ben' rue quie xti'idza' Diuzi lèbè'.

⁹Na'ra rulajè' tu tacubi rnajè' caniga:

Luè' na' zaco' si'lo' libro na', ichipo' ta nerionan.

Luè' zaco', como dan' bèti ja benè' luè', ulato ren quio'. Cana' udižulo' quie dula' xquia quie ja benè' cuenda gacajè' ben' quie Diuzi.

Udižulo' quie dula' xquia quie ben' naca con nutezi ja raza, con nutezi ja di'idza', con bitezi ja yedyi, con bitezi ja naciòn.

¹⁰Uliolo' lèjè' gacajè' rey, gacajè' pxuzi quie Diuzi quiero.

Na'ra inabè'jè' lao yedyi layu.

¹¹Caora na' una'a beda' ja ángel zè gula. Neyèchojè' ru'alao xlato ben' na', len ben' naca ca forma bia guixi', len ben' gula, ben' rnabè'ja. Zè million naca ja ángel. ¹²Na' unèjè' zidzo unajè' caniga:

Ben' naca ca quie beco' ži'ila', bèti ja benè' lèbè', zaca'nè' tzionla'adyi' ja benè' lèbè'. Zaca'nè' yèbijè' lèbè' caniga: Luè' naco' ben' de yela' rnabè' quie.

Luè' naco' xa'n yugulute ta de. Luè' naco' ben' rioñe'e yugulute. Luè' naco' ben' de yela' huaca quie.

Luè' naco' ben' bala'ana, ben' belaoztégue.

Luè' naco' ben' huendo' ben' že.

¹³Na'ra beda' unè yugulu ta bè Diuzi, ta inaro, yugulu ta zu guibá, len yugulu ta zu lao yedyi layu, len yugulu ta zu ga yu'u ben' huati, len yugulu ta zu lu'u nisadao', len yugulute ta de. Beda' unèjan unajan caniga:

Ben' re' xlatogue, len ben' naca ca quie beco' ži'ila', nacajè' ben' huendo' ben' že.

Nacajè' ben' bala'ana, ben' belaoztégue. Nacajè' ben' de yela' rnabè' quie.

Cana' naca quiejè' tuzioli.

¹⁴Na'ra una tapa ben' naca forma ca bia guixi' caniga:

—Can' gaca.

Lëscan' uditzu žibi galobetapa ben' gula, ben' rnabè'ja, uyonla'adyi'jè' ben' zu tuzioli.

**Ni rguixogue'n quie xopa
ta nerio libro na'**

6 Na'ra blè'èda' cati pchipa ben' naca ca quie beco' ži'ila' ta nerio libro na' tanèro lao gadyi ta nerionan. Beda' rchi' tu ben' nèro, ben' naca quie lao tapa ben' naca forma ca bia guixi'. Beda' rchi'nè' ca rchi' bdyito hueziu'. Na' unanè' nè'èdi':

—iUdacara ilè'èlo'!

²Na'ra cati una'a blè'èda' tu caballo bezèri. Lëscan' blè'èda' dyia tu benè' xcu'udzuba'. Lëben' na' zènè' tu ta chu'un flecha. Na' bè'jè' lebè' tu coron. Lëscan' bè'jè' lebè' yela' rnabè'. Na' uza'nè' zionè' ta sueranè' hueranè' gan tilalènè' yaca ben' naca enemigo quienè'.

³Cati pchipa ben' naca ca quie beco' ži'ila' ta nerio libro na' taurupe, caora na' beda' cati unè ben' urupe, ben' naca quie lao tapa ben' naca forma ca bia guixi'. Unanè' nè'èdi':

—iUdacara ilè'èlo'!

⁴Na'ra cati una'a blè'èda' bro itu caballo žna dyia tu benè' xcu'udzuba'. Na'ra ben' dyia xcu'udzuba' na', napè' yela' rnabè' ta uxenè' dila lao yedyi layu ta guti ja benè' laguedyijè'. Caora na' bè'jè' lebè' tu espada že gula.

⁵Na'ra cati pchipa ben' naca ca quie beco' ži'ila' tauyune nerio libro

na', caora na' unè ben' uyune, ben' naca quie lao tapa ben' naca forma ca bia guixi'. Na' unanè' nè'èdi':

—iUdacara ilè'èlo'!

Na' cati una'a blè'èda' itu caballo gaso dyia benè' xcu'udzuba'. Blè'èda' ben' dyia xcu'udzuba' zènè' tu žiga' de onza. ⁶Caora na' beda' cati unè ben' uyune, ben' naca quie lao tapa ben' naca forma ca bia guixi', rëbinè' ben' dyia xcu'udzu caballo:

—Lažo quie ben' rue dyin tu dza, cana' saca' tu kilo trigo, cana' saca' tzona kilo cebada. Pero biudyiagui'lo' yaga olivo ta cuio ja benè' aceite. Lëscan' biudyiagui'lo' luba bedzuli' ta cuio ja benè' vino.

⁷Na'ra cati pchipa ben' naca ca quie beco' ži'ila' taudape ga nerio libro na', caora na' beda' unè ben' udape, ben' naca quie lao tapa ben' naca forma ca bia guixi'. Unè'è' unanè' nè'èdi':

—iUdacara ilè'èlo'!

⁸Na'ra cati una'a blè'èda' bro itu caballo gachi, bia dyia tu benè' xcu'udzuba'. Na' ben' dyia lëba' na' laohuè' Yela' Guti. Lëscan' blè'èda' xcu'udzunè' zena' itu ben' laohuè' Yero Ba Ga Yu'u Ben' Huati. Bè' Diuzi lëjè' lato ta gutijè' tu naga quie ja ben' nita' lao yedyi layu. Bè'nè' lato gutijè' lëjè' conlè huedila, conlè ubin, conlè yela' huè', conlè ja bia guixi' mala gula, bia zu lao yedyi layu.

⁹Na'ra cati pchipa ben' naca ca quie beco' ži'ila' taga'yo' ga nerio libro na', caora na' una'a blè'èda' žan ru'aba ta zu guibá, blè'èda' zu ja bichi be quie ja ben' guti nun quie udxogujè' xti'idza' Diuzi.

Ta bē yaca ben' nita' lao yedyi layu bētijē' lējē' nun quie dan' udixogue'jē' xti'idza' Diuzi. ¹⁰Na'ra beda' unē ja ben' zu žan ru'aba ta zu guibá, beda' rnējē' zidzo gula rnajē' caniga:

—Señor, ben' la'iya luē'. Luē' uzulo' di'idza' ca unao' huelo'. ¿Bata ichugulilo' huelo' castigo ja ben' nita' lao yedyi layu, ja ben' bēti nēto'?

¹¹Na'ra bē' Diuzi lējē' tu huio žabajē' bezēri ta gucojē'. Caora na' una Diuzi rēbinē' lējē':

—Ulecueza itu tiempo cuenda gacale completo, porque nezu ben' nerdziogue, ben' nuelē le'e tuže, ben' rue ca mandado rue Cristo. Binedyin dza guti ja benē' lējē' cabē' bētijē' le'e.

¹²Na'ra cati pchipa ben' naca ca quie beco' ži'lila' taxopa ga nerio libro na', caora na' guca tu užu' huala gula, na' beyaca ubidza chula ca tu la'ari' gaso gula. Lēscan' beyaca biu' rna'n ca ren. ¹³Caora na' bguino bélo gusi'jan lao dyilayu. Guca quie bélo cabē' raca quie yaga higo cati rda tu be bedun' fuerte gula, rguino ja higo ya'a quienen rasi'jan layu. ¹⁴Na'ra bedubi ladza cabē' retubiro guichi, bira ilē'eron. Lēscan' bzisi ja ya'a, len ga de yu bidyi lu'u nisadao' ga zujan naca xlaton. ¹⁵Caora na' pcachi'lao ja ben' naca ja rey nita' lao yedyi layu. Pcachi'laorē ja ben' naca ben' belao quiejē', len ja ben' uña'a, len ja ben' naca comandante, len ja ben' de yela' rnabē' quie. La'acazi ben' nada'o, la'acazi ben' libre, pcachi'laojē' žan beló, pcachi'laojē' žan yo yela. ¹⁶Na'ra unajē' rēbijē' ya'a len yo yela:

—Ulecachi' nēto' cuenda bira ilē'ē ben' re' xlatogue guibá nēto' ta bigaca quiendo' ca castigo huala gula rue ben' naca ca quie beco' ži'lila' nēto'.

¹⁷Pues abdyin dza hue Diuzi castigo lao yedyi layu. ¿Ca nuži ben' sue, ben' gacaja ca castigo huenē'?

Ni rguixogue'n quie ja ben' Israel, ben' neguichi' sello quie Diuzi

7 Na'ra ude beyudyi na', blē'ēda' tapa ángel zējē' tu huiojē' lao dapa squin yedyi layu. Zējē' ruza'agajē' ta bita lao dapate be rda lao yedyi layu. Cana' bējē' tacuenda bita be lao yedyi layu, ni lao nisadao', ni ta utan yaca yaga. ²Na'ra lēscan' blē'ēda' za' itu ángel zaca' ni ga rlē ubidza, zēnē' tu sello quie Diuzi, ben' zu neban tuzioli. Na'ra lēángel na' uredyiya'nē' zidzo gula blidzanē' tapa ángel. Na' bē' Diuzi tapa ángel yela' rnabē' ta udyiagui'jē' yedyi layu len nisadao'. Na'ra una ángel na' rēbinē' tapa ja ángel na' caniga:

³—Tu raca na' nerdzioguen cuiobē'ro uquichiro sello žga ja ben' quie Diuzi, biudyiagui'le yedyi layu, biudyiagui'le nisadao', biudyiagui'le ja yaga.

⁴Na'ra beda' tu cani naca ja ben' neguichi' sello, ben' naca ja familia quie ben' Israel. Beda' tu gayuhua chopo galo tapa mila nacajē'. ⁵Chipchopa mila naca ja ben' familia quie Judá, na' chipchopa mila naca ja ben' familia quie Rubén, na' chipchopa mila naca ja ben' familia quie Gad, ⁶na' chipchopa mila naca ja ben' familia quie Aser, na' chipchopa mila naca

ja ben' familia quie Neftalí, na' chipchopa mila naca ja ben' familia quie Manasés, ⁷na' chipchopa mila naca ja ben' familia quie Simeón, na' chipchopa mila naca ja ben' familia quie Leví, na' chipchopa mila naca ja ben' familia quie Isacar, ⁸na' chipchopa mila naca ja ben' familia quie Zabulón, na' chipchopa mila naca ja ben' familia quie José, na' chipchopa mila naca ja ben' familia quie Benjamín. Cana' naca lista quie ja ben' neguichi' sello.

Ni rguixogue'n quie ben' zë gula, ben' naco la'ari' bezëri

⁹Na'ra ude beyudyi na', cati una'a blë'ëda' negu'udi' ben' zë gula. Negu'udi' ben' quie yugulute nación, len ben' quie yugulute ren, len ben' quie yugulute cue' di'idza', len ben' quie yugulute yedyi. Na'ra blë'ëda' neyëchojè' ru'alao gan' re' ben' re' xlatogue, len gan' zë ben' naca ca quie beco' ži'ila'. Na'ra ben' neyëcho na', nacajè' ben' zë gula. Nitu ganu sue ulaba lëjè'. Nacojè' yugulutejè' la'ari' bezëri, zëjè' la'aga' zin. ¹⁰Lëscan' yugulujè' urediyajè' zidzo gula unajè' caniga:

Diuzi quiero, ben' re' xlatogue, len ben' naca ca quie beco' ži'ila', lëjè' bapselajè' nëto'.

¹¹Na'ra yugute ja ángel na' neyëchojè' ru'alao gan' re' ben' re' xlatogue, len gan' re' ben' gula, ben' r nabè'ja, len gan' zë yaca ben' naca forma ca bia guixi'. Caora na' byëcho ja ángel, bda' ru'ajè' layu gan' re' ben' re' xlatogue, uyonla'adyi'jè' lëbè'. ¹²Na' unajè' cani:

Cani nacan quie Diuzi quiero. Naca Diuzi ben' tzionla'adyi'ro, ben' huero ben' že.

Naca Diuzi ben' rioñe'e yugulute, ben' yëbiro diuxcalelo'.

Naca Diuzi ben' bala'ana, ben' de yela' r nabè' quie, ben' de yela' huaca quie.

Cana' nacan quie Diuzi quiero tuzioli. Amén.

¹³Na'ra tu ben' gula, ben' r nabè' na', unabanè' në'ëdi' caniga:

—¿Nuži ja ben' niga, ben' naco ja la'ari' bezëri? ¿Gaži uzal'jè'?

¹⁴Na'ra gucha'nè' caniga:

—Señor, luè' nezo'.

Na' unè' rëbinè' në'ëdi':

—Lëja ben' niga uzal'jè' ga guca zëdi gula lao yedyi layu. Abeyacajè' ben' laxta'o yëri lao Diuzi nun quie dan' unaojè' xneza ben' naca ca quie beco' ži'ila'. Na' nacojè' la'ari' bezëri ta uyërin conlë ren quienè'. ¹⁵Quie lena' nital'jè' zaquè'lao ga re' Diuzi ga naca xlatonè'. Rionla'adyi'jè' Diuzi du dza, du yela, ga zu idao' quienè' guibá. Na'ra rapa Diuzi lëjè' ta gabi gaca quiejè'.

¹⁶Bira yedzagalaojè', bira idzioguejè' ta gaojè' ta yo'ojè'. Bira udyiagu' oba lëjè', nicara gaquejè' žla quien. ¹⁷Cana' gaca quiejè' como dan' bazè ben' naca ca quie beco' ži'ila' zaca'lao ga re' Diuzi xlatogue'. Rapa ben' naca ca quie beco' ži'ila' lëjè' ca quie ben' rapa beco' ži'ila' quie. Rehua'anè' lëjè' ga zu nisa ta ri'ojè' ta ru'en lëjè' yela' neban quiejè' tuzioli. Bira cuedyijè', porque barapa Diuzi lëjè'.

Ruchipa ben' naca ca quie beco' ži'ila' tagadyi ta nerio libro na'

8 Na'ra cati pchiba ben' naca ca quie beco' ži'ila' na' tagadyi ta nerio libro na', caora na' ure' chizi

guibá ca du gatzó hora. ²Caora na' blè'èda' igadyi ángel nita'jè' zaquè'lao ga zu Diuzi. Na'ra bè' Diuzi lèjè' gadyi trompeta. ³Beyudyi ude na', blè'èda' itu ángel zènè' tu ye'n yalo de oro. Na' zunè' zaquè'lao lao ru'aba bè'jè' lèbè' yalo zè gula ta bdyianè' lao ru'aba ca gun quie Diuzi ta tzèpi dzen quien ga zu Diuzi tuže conlè di'idza' ru'elè ben' rue quie xti'idza' Diuzi lèbè'. Na' lèru'aba na' nacan de oro, zun zaca'lao ga re' Diuzi. ⁴Na'ra lao na'a ángel na' uyèpi dzen quie ye'n yalo tuže len di'idza' ru'elè ben' rue quie xti'idza' Diuzi lèbè' ta bdyinnan ga re' Diuzi. ⁵Caora na' uzi' ángel ye'n yalo na' psedza'nè'n bao' ure'n gui' ta dyia lao ru'aba uzi'nè'n uru'unnè'n lao yedyi layu. Cana' guca uyèpi yesa, gotzo bdyito hueziu', guca užu' lao yedyi layu.

Rucuedyi ja ángel ja trompeta quiejè'

⁶Na'ra lao gadyi ja ángel, ben' zè ja gadyi trompeta na', ulisajè' trompeta quiejè' ta ucuedyijè'n.

⁷Na'ra cati pcuedyi ángel nèro trompeta quienè', caora na' bguino yo hueziu' len gui' dupen ta naca ca ren lao yedyi layu. Dyin quie len, uyei tu cue' quie lao tzona cue' yedyi layu, lèscan' uyei tu cue' quie lao tzona cue' yaga, lèscan' uyei tu cue' quie lao tzona cue' guixi' ya'a.

⁸Na'ra cati pcuedyi ángel urupe trompeta quienè', caora na' bguino tu ta naca ca tu ya'a ra'ala'n gui' lu'u nisadao'. Guca tu cue' quie lao tzona cue' nisadao' ca ren. ⁹Lèscan' guti tu cue' quie lao tzona cue' bia yu'u lu'u nisadao', lèscan' udyiagui' tu cue' quie lao tzona cue' ja barco rda lao nisadao'.

¹⁰Na'ra cati pcuedyi ángel uyune trompeta quienè', caora na' bguino tu bélo že gula lao yedyi layu ra'ala'n gui'. Dyin quie len udyiagui' tu cue' quie lao tzona cue' yao, lèscan' udyiagui' tu cue' quie lao tzona cue' ga rlè nisa. ¹¹Lèbélo na' lao bélo sla' gula. Dyin quie len beyaca tu cue' quie lao tzona cue' nisa sla' gula. Aguti ben' zè nun quie dan' hue'ejè' nisa na', como dan' sla' gula beyacan.

¹²Na'ra cati pcuedyi ángel udape trompeta quienè', caora na' udyiagui' tu cue' quie lao tzona cue' ubidza, lèscan' udyiagui' tu cue' quie lao tzona cue' biu', lèscan' udyiagui' tu cue' quie lao tzona cue' bélo. Quie lena' bega'n tu cue' quie lao tzona cue'jan lato chula. Na'ra bipseni' xni' ubidza tu cue' quie lao tzona cue' quie dza. Lèscan' bipseni' xni' biu', bipseni' xni' bélo. Tu cue' quie lao tzona cue' quie yela bipseni'yacan.

¹³Caora na' una'a beda' cati unè tu ángel rzènè' ladza gatzó guibá. Rnènè' zidzo rnanè' caniga:

—iBayèchi' gula nacan quie ja ben' nita' lao yedyi layu cati ucuedyi itzona ángel trompeta quiejè'!

9 Na'ra cati pcuedyi ángel ga'yo' trompeta quienè', blè'èda' tu ta naca ca bélo uyèzin guibá bdyinnan lao yedyi layu beyacan ángel. Na' bè' Diuzi ángel na' tu ži'guiba quie tu poso zitu' gula. ²Na'ra psalo ángel na' ru'a poso zitu' gula. Caora na' lu'u poso na' bro dzen cabè' dzen rero ru'a horno. Nun quie rero dzen na', bechula xni' ubidza, lèscan' bechula ladza. ³Na'ra lu'u dzen na' bro

ja bëchi'zu rdajaba' rzëjaba' lao yedyi layu. Bë' Diuzi lato quiejaba' ta qui'idyi'ljaba' ja benë' cabë' rgu'i'idiyi' xuni'. ⁴Pero bibë' Diuzi lëjaba' lato ta udyiaguil'jaba' guixi' ni ta udyiaguil'jaba' ta raza ja benë', ni ta udyiaguil'jaba' ja yaga. Pero bë Diuzi lëjaba' mandado ta qui'idyi'ljaba' ja ben' bida' žga sello quie Diuzi. ⁵Bibë' Diuzi lëjaba' lato ta gutijaba' ja benë', pero solamente ta qui'idyi'ljaba' lëjë' ilajë' lao ga'yo' biu'. Na'ra cabë' rla nu benë' cati rgu'i'idiyi' xuni' lëjë', cana' ulajë'. ⁶Na'ra lëdza cati gaca quie ja ben' nita' lao yedyi layu cana', lega gue'enjë' gatijë', pero bigatijë'. Ba'ala'cazi gue'enjë' iyudyi yedu quiejë', bisi' yela' guti quiejë' lëjë'. ⁷Na'ra lëja bëchi'zu na', nacajaba' forma ca caballo, bia listo ta rio lao dila. Zun guichojaba' tu ta naca ca coron de oro. Pero zu laojaba' ca zu lao benë'. ⁸Naca guitza' guichojaba' ca guitza' guicho nigula. Lëscan' dyia lejijaba' ca dyia lei león. ⁹Na'ra lëbëchi'zu na', yu'u ru'achu'uba' tu ta naca de guíba. Lëscan' xilaba' ruen ru'be cabë' ru'be rue zë carreta ta rguba ja caballo cati yu'ujaba' be tziojaba' lao dila. ¹⁰Lëscan' zu žbamba' ca zu žbam xuni'. Zurën yëchi' ca zu žbam xuni'. Napa žbanjaba' fuerza ta qui'idyi'ljaba' ja ben' nita' lao yedyi layu lao ga'yo' biu'. ¹¹Na'ra zu tu ben' naca xa'n bëchi'zu. Lëben' na' naquë' ángel, naquë' ben' rnabë' lu'u poso zitu' gula. Na' di'idza' hebreo lao ángel na' Abadón. Lëscan' di'idza' griego lao ángel na' Apolión, ta inaro xti'idza'ro, ben' rudyiaguil' ja benë'.

¹²Cana' guca aode tu ta naca bayëchi' gula, pero neracara falta gaca ichopan.

¹³Quie lena' cati pcuedyi ángel xopa trompeta quienë', caora na' beda' bro tu rchi' benë' lao dapa squin ru'aba de oro ta zu zaquë'lao ga zu Diuzi guibá. ¹⁴Lëscan' beda' rchi' ben' na' rëbinë' ángel xopa, ben' zë trompeta quie unë' caniga: —Ulexëdyi dapa ángel, ben' nerio ru'a yao že Eufrates.

¹⁵Cana' pxëdyijë' dapa ángel na' ta gutijë' tu cue' quie lao tzona cue' ja benë' nita' lao yedyi layu. Dyin bë Diuzi bega'një' neriojë' hasta idyin hora, hasta idyin dza, hasta idyin biu', hasta idyin iza ixëdyijë' ja ángel na'. ¹⁶Na'ra beda' anaca soldado quiejë' chopa gayuhua million, ben' dyia ja caballo.

¹⁷Na'ra guca quia' ca quie ben' uxusa, blë'ëda' caballo na'. Lëscan' blë'ëda' ben' dyia lëba' yu'u guíba ru'achu'ujë' ta naca culuri žna, len culuri azul, len culuri gachi. Na'ra naca guicho caballo na' ca guicho león. Lëscan' ru'a caballo na' reron gui' len dzen len ta ra'ala' gui' laona azufre. ¹⁸Na'ra guti tu cue' lao tzona cue' ja benë' nita' lao yedyi layu. Dyin quie tzona cue' castigo ta bro ru'a caballo bdyiaguil'nan lëjë', ta inaro, bdyiaguil' gui' lëjë', lëscan' bdyiaguil' dzen lëjë', tu ta ra'ala' gui' laona azufre lëjë'. ¹⁹Na'ra lu'u ru'a ja caballo yu'u fuerza quiejaba' ta udyiaguil'jaba' ja benë'. Lëscan' de fuerza quie žbanjaba'. Naca žbanjaba' ca bëla zë. Na'ra conlë bëla naca žban ja caballo bëjaba' hue' ja benë'.

²⁰Na'ra ja ben' bega'n, ben' biguti nun quie ja castigo, biptza'jè' pensari quiejè' ta usanjè' cabè' ruejè'. Lëscan' bipsanjè' cabè' ruejè' rionla'adyi'jè' taxi'ihui', bipsanjè' cabè' ruejè' rionla'adyi'jè' ja ídolo ta naca de oro, len ja ídolo ta naca de plata, len ja ídolo ta naca de bronce, len ja ídolo ta naca de yo, len ja ídolo ta naca de yaga. Pues yaca ídolo na' birlè'ën, birena, birza'n. ²¹Na'ra lëscan' biptza'jè' pensari quiejè' ta usanjè' bira gutijè' benè', bira huejè' brujo, bira gasilèjè' ja nigula binaca žgulajè', bira cuanjè' quie benè'.

Ni ru'en di'idza' quie tu ángel,
ben' zè tu guichi naca rollo

10 Na'ra blè'èda' itu ángel, ben' lega de yela' huaca quie. Uyëzinè' guibá dubinè' beo bdyinnè' lao yedyi layu. Na'ra guichonè' zunan tu byeta'. Lëscan' laohuè' rna'n raca titi' ca rna' ubidza. Naca sunnè' ca plare ta rna' ca gui'. ²Lëscan' blè'èda' zènè' tu guichi naca rollo nasalonè'n. Blè'èda' ni'anè' yebè blionè' lao nisadao'. Lëscan' itzala' ni'anè' yega' blionè' lao yu bidyi. ³Na'ra urediyi' ángel na' unènè' zidzo gula cabè' rue león cati rbediyi'ba'. Cati urediyi' ángel na', caora na' unè gadyi hueziu'. Na'ra beda' cabè' unajan. ⁴Cati ude beyudyi beda' cabè' una gadyi hueziu' na', na'ra gue'enda' uzua'n lè'è guichi ca unajan. Pero caora na' beda' tu rchi' ben' unè nè'èdi' guibá. Na' unè' rëbinè' nè'èdi' cani:

—Pcachi' cabè' una gadyi hueziu' na' luè'. Biuzulo'n lè'è guichi.

⁵Na'ra lëángel na', ben' blè'èda' nulio lao nisadao' len yu bidyi, caora na' ulisanè' ladza na'anè' yebè ⁶bguntenè' ben' zu tuzioli, ben' bzalo guibá, len dyilayu, len nisadao', len yugulute ta de. Na'ra unè' caniga:

—Abdyin hora na'a. Bira de tiempo. ⁷Na'ra bè' idyin tiempo sulao ángel gadyi ta ucuedyinè' trompeta quienè', caora na' su di'idza' gaca cabè' di'idza' belao udixogue' Diuzi ja ben' quienè', ben' udixogue' xti'idzè' dza na'.

⁸Na'ra tatula beda' unè ángel, ben' unè nè'èdi' guibá. Na' unè' rëbinè' nè'èdi' cani:

—Uyo yexi' guichi naca rollo nayalo ta zè ángel na', ben' nulio lao nisadao' len yu bidyi.

⁹Na'ra uya' gan' zè ángel na', unaba'nè' ta gunnè'n nè'èdi'. Na'ra unè' rëbinè' nè'èdi' caniga:

—Uži'n, udaona. Bè' gaolo'n hueyacan žixi gula ca bdyin'dao' lu'u ru'alo'. Pero bè' baodëbo'n baoyëzin lu'u lè'ëlo', na'ra hueyacan sla' gula.

¹⁰Na'ra ben' ángel na' nè'èdi' guichi naca rollo. Bè' udaohua'n beyacan žixi gula ca bdyin'dao' lu'u ru'a. Pero bè' baodëba'n baoyëzin lu'u lè'ëna', na'ra beyacan sla' gula.

¹¹Na'ra unajè' nè'èdi' caniga:

—Tatula reya'ala' quixogue'lo' benè' cabè' una Diuzi cabè' ta baza' gaca quie yedyi zè, len quie nación zè, len quie zè cue' di'idza', len quie zè cue' ben' naca rey.

Ni ru'en di'idza' quie chopa
ben' naca testigo quie Diuzi

11 Na'ra benjè' nè'èdi' tu huenixi' ta naca ca yaga ta

rzèjè' rurixijè'. Na'ra beda' tu rchi' benè' unanè' nē'èdi' caniga:

—Uyo yerixi bala žicho naca idao' quia' len ru'aba quien. Lëscan' ulabo' bala naca ben' rionla'adyi' nē'èdi' na'. ²Pero biurixo' lali'a quie idao' nun quie dan' na' rda ja ben' yedyi tula, ben' binaca ja ben' Israel. Pues lëben' na' huadyinjè' tajè' bigapajè' bala'ana ciudad Jerusalén, ciudad naca la'iya. Cana' huejè' lao chopa galo chopa biu'. ³Na'ra nē'èdi' ise'ela' chopa ben' naca testigo quia', nacojè' la'ari' ca la'ari' ta naco ja ben' guti familia quie. Huaguixogue'jè' benè' tanun quia' nē'èdi' lao tu mila chopa gayuhua tzona galo dza. —Cana' unanè' nē'èdi'.

⁴Na'ra lëchopa ja ben' naca testigo quie Diuzi, nacayaquè' ca quie chopa yaga olivo. Lëscan' nacajè' ca quie chopa candelero ta zu lao Diuzi, ben' naca xan' yedyi layu. ⁵Na'ra chi nu ben' re'en udyiagui' ben' naca testigo quie Diuzi, huario gui' lu'ru ru'ajè' ta uzejjè' ben' re'en udyiagui' lëjè'. Cana' gati nutezi ben' re'en udyiagui' lëjè'. ⁶Na'ra bade yela' rnbè' quiejè' ta huejè' mandado bihuen nisayo lao yedyi layu dza rdajè' rguixogue'jè' ja benè' tanun quie Diuzi. Lëscan' bade yela' rnbè' quiejè' yeyuejè' nisa iyacan žna ca ren. Lëscan' bade yela' rnbè' quiejè' ta uxejè' ta lega yedzagalao ja ben' nita' lao yedyi layu, lëscan' ta uxejè' zè cue' ta udyiagui' benè'. Con bala cue' ta re'enjè' gata' ta udyiagui' ja benè', cana' huejè' mandado gaca. ⁷Pero bè' iyudyi huejè' ca mandado

re'en Diuzi huejè', na'ra tilalè tu bia guixi' mala gula lëjè', bia bro lu'u pozo zitu' gula. Na'ra hueba' lëjè' gan, gutiba' lëjè', ⁸uca'mba' cuerpo quiejè' lëciudad na' ga bda'jè' Señor quiero lè'è yaga cruzo. Biucachi'yaquè' leyaquè', pero yega'n cuerpo quieyaquè' la callezi. Quie lëciudad na' huazaque' inaro nacan ca quie ciudad Sodoma, ciudad mala gula. Lëscan' nacan ca quie nación Egipto. ⁹Ben' za' zè yedyi tula, ben' nacaja ren tula, ben' racaja zè cue' di'idza' tula, ben' za' zè nación tula, hualè'èjè' cuerpo quiejè' lao tzona dza yugatzo, pero bihue'jè' lato ucachi'jè' cuerpo quiejè'. ¹⁰Na'ra lega yedaohue ja ben' nita' lao yedyi layu sujè' gusto dan' guti ja ben' na'. Tantozi sujè' gusto, ise'ela'jè' regalo quie quie laguediyjè'. Lega raxejè' aguti ja ben' na', como dan' lega rdza'jè' ben' rguixogue' tanun quie Diuzi. ¹¹Na'ra ude guca lao tzona dza yugatzo, useban Diuzi lëjè' yeyasajè' tatula. Caora na' yugulu ben' blè'è cabè' guca quiejè', lega bdzebijè'. ¹²Caora na' chopa ben' naca testigo, bejè' rchi' tu ben' unè zidzo guibá unè' rëbinè' lëjè' caniga:

—Uleyèpi niga.

Caora na' beyèpijè' lao beo zeyojè' guibá blè'è ja ben' naca enemigo quiejè' lëjè'. ¹³Ude na', lagucate tu užu' fuerte gula, byala tu cue' yu'u quie lao chi cue' yu'u quie ja ben' ciudad na'. Lëscan' nun quie užu' guti gadyi milajè'. Caora na', ben' bega'nja bigutija, lega bdzebijè' unajè'

naca Diuzi ben' de yela' huaca quie.

¹⁴Caná' ude taorupe ta naca bayëchi' gula, pero taoyune laza'te gaca ta naca bayëchi' gula.

Pcuedyi ángel gadyi trompeta quienë'

¹⁵Na'ra pcuedyi ángel gadyi trompeta quienë'. Caora na' unë ja ben' zulë Diuzi guibá zidzo unajë' cani:

Diuzi len ži'inë' Cristo, ben' use'elë' lao yedyi layu, abdyin dza inabë'jë' lao yugulu ben' rnabë', ben' nita' lao yedyi layu.

Biyeyudyi biyedu inabë'jë'.

¹⁶Na'ra lëgalobetapa ja ben' gula, ben' rnabë'ja re'ja lao xlatojë' zaquë'lao ga re' Diuzi guibá, lëjë' gutajë' guzuru'ala layu uyonla'adyi'jë' Diuzi. ¹⁷Cani unajë' rëbijë' Diuzi:

Rnando' luë' diuxcalelo', Señor. Luë' naco' Diuzi, ben' de yugulute yela' rnabë' quie tuzioli.

Zulo' nebanlo' tuzioli.

Abdyin hora huelo' mandado ta hue ja benë' ca re'enlo' huejë'.

Abdyin hora inabë'lo' lao yedyi layu.

¹⁸Abdza' ja ben' nita' lao yedyi layu luë'.

Pero na'ra abdyin dza huelo'jë' castigo, abdyin dza ichugulilo' quie ja ben' huati.

Abdyin dza quižulo' ben' udixogue' di'idza' quio', ben' naca ben' la'iya quio', ben' udapa luë' bala'ana.

Abdyin dza quižulo'jë' yugulujë'.

Abdyin dza udyiagui'lo' ben' rudyiagui' yedyi layu.

¹⁹Na'ra uyalo ga rionla'adyi'jë' Diuzi guibá. Caora na' blë'ëjë' tu caja ga yu'u di'idza' bega'ntza'olë Diuzi ja ben' unita' tiempote. Cati uyalon, na'ra uyëpi yesa, gotzo bdyito hueziu', lëscan' guca užu', bguino yo hueziu' dužeten.

Ni rnën quie tu nigula len tu bia guixi' snia gula nacaba' ca bëla

12 Na'ra guca tu seña guibá. Bla' tu nigula nedubinë' xni' ubidza. Naconë'n nacan ca quie žabanë'. Lëscan' xni'anë' zu biu'. Lëscan' zu tu coron guichonë' ga dyia chipchopa bélo. ²Nu'anë' bdao' rbedyia'në' bedzagalaonë' len bdao'. Ruen žhue'në' ta su bdao' quienë'. ³Na'ra guca itu seña guibá. Bla' tu bia guixi' snia gula nacaba' ca bëla, nacaba' culuri žna. Naca gadyi guichoba'. Dyia chi luzuba'. Lëscan' zu tu huio coron lao gadyi guichoba'. ⁴Conlë žbamba' pquinoba' tu cue' quie lao tzona cue' bélo lao yedyi layu. Caora na' uzëba' lao nigula, ben' su bdao' quie, cuenda gaoba' bdao' quienë' bë' subi'. ⁵Caora na' uzu tu bdao' byu quie nigula na'. Lëbdao' na', cati banacabi' ben' huaca, huanabë'në' lao yedyi layu ta yu'u ni'a xnezi. Na'ra labezi'te Diuzi bdao' na', zeyu'anë'bi' yesannë'bi' ga re'në' lao xlatoguë'. ⁶Lëscan' bžuno nigula na', zionë' lao lato ga bidyia yu'u. Lëlato na' nacan ga pcueza Diuzi ta gao nigula na' lao tu mila chopa gayuhua tzona galo dza.

⁷Cati ude beyudyi na', guca tu dila guibá. Na'ra ángel Miguel len ja ángel quienè', udilalèjè' lèbia guixi' snia gula len ángel quieba'.
⁸Pero biužaque'ba' huelèba' ángel quieba' gan. Cana' abeyudyi tiempo quieba' len ángel quieba'. Bira saque' sulèba' ángel quieba' guibá. ⁹Cana' guca uliojè' lèba' guibá. Na'ra lèbia guixi' snia gula laoba' xan' taxi'ihui'. Lëscan' laoba' Satanás. Lèba' rzi'ba' yè' ja ben' nita' lao yedyi layu. Cana' guca uru'unjè'ba' lao yedyi layu len ja ángel quieba'.

¹⁰Na'ra beda' tu rchi' benè' unènè' zidzo guibá unanè' cani:

—Babdyin dza ute usela Diuzi yaca ben' quienè'. Barnabè' Diuzi quiero len ben' naca Cristo quienè' lao yedyi layu. Baoru'unjè' ben' udao xquia yaca ben' nao xneza Jesús. Du dza, du yela, udao Satanás lèjè' xquia lao Diuzi. ¹¹Bèjè' gan lao taxi'ibi' nun quie guti Cristo, ben' naca ca quie beco' ži'ila', bia naca gun quie Diuzi. Bèjè' gan nun quie bibdzebijè' udixogue'jè' xti'idza' Diuzi. Bibdzebijè' chi guti ja benè' lèjè', na' uzujè' dispuesto gatijè'. ¹²Pues yedaohuele le'e, ben' zu guibá. Pero bayèchi' gula nacan quiele le'e, ben' nita' lao yedyi layu, la'acazi zule yu bidyi, la'acazi zule lao nisadao'. Naca bayèchi' gula quiele como dan' baoyèzi xan' taxi'ibi' yedyi layu ga nita'le. Lega bdza'nè' nun quie dan' nezinè' baruen bago dza yeyudyi yedu quienè'. —Cana' una ben' na'.

¹³Na'ra cati blè'è lèbia guixi' snia gula cabè' bèjè' quieba', uliojè'ba' guibá, pquinojè'ba' lao yedyi layu,

caora na' uza'ba' zioba' unaoba' nigula, ben' baozu bdao' quie.

¹⁴Pero bè' Diuzi nigula na' chopa xila yela ca xila psia cuenda sènè' ladza tzionè' lao lato ga bidyia yu'u, ga nacan zitu'. Lënigula na' bè'jè' ta udaonè' lao tzona iza yugatzo.

¹⁵Na'ra bro nisa lu'u ru'a bia guixi' snia gula na', udixoba' tu yao že cuenda idyinnan ga zu nigula gatinè' lu'u nisa. ¹⁶Pero gualè layu nigula na', uxa'ana' ru'an hue'enan nisa bro ru'a bia guixi' snia gula.

¹⁷Quie lena' lega bdza'ba' nigula na' zioba' tzetilalèba' yaca ži'isuba nigula na', yaca ben' ruzu rue cabè' mandado rue Diuzi, yaca ben' rnao con cabè' rna xti'idza' Jesucristo du guicho du la'adyi'.

Ni ru'en di'idza' quie chopa bia guixi' bayatza gula

13 Na'ra uzua' ru'a nisadao' ga naca layu bidyi, caora na' blè'èda' bro itu bia guixi' bayatza gula lu'u nisadao'. Blè'èda' naca gadyi guichoba'. Lëscan' blè'èda' dyia chi luzuba'. Na' tu huio lao luzuba' zun tu huio coron. Lëscan' lè'è gadyi guichojaba' zu laojaba' quie quie ca laojaba'. Pero ca naca laojaba' nacan ta utasi unioyacan Diuzi. ²Na'ra lèbia guixi' bayatza gula, bia blè'èda', nacaba' forma ca bèdyi. Naca ni'aba' ca ni'a oso. Zu ru'aba' ca zu ru'a león. Caora na' lèbia guixi' snia gula nacaba' ca bèla, bè'ba' xlato bia guixi' bayatza gula ga cue'ba'. Lëscan' bè'ba' lèba' yela' rnabè' ta inabè'ba' lao yedyi layu. ³Na'ra tu guichoba' zun tu hue' ta gutin lèba', pero beyaca hue' na'. Quie lena' lega beban ja

ben' nita' lao yedyi layu unaojë'ba'.
 4Na'ra uyonla'adyi'jè' bia guixi' snia
 gula, como dan' bë'ba' bia guixi'
 bayatza gula yela' r nabè' quieba'.
 Lëscan' uyonla'adyi'jè' bia guixi'
 bayatza gula. Na' unajë' caniga:
 —Ganura zu naca ca lëba'. Nunu
 sue tilalë lëba'.

5Na'ra bia guixi' snia gula bë'ba'
 bia guixi' bayatza gula lato ta
 hueba' že cuimba' ta utasi unioba'
 Diuzi. Lëscan' bë'ba' lëba' lato ta
 inabë'ba' ca tu re'emba' inabë'ba'
 chopa galo chopa biu'. 6Na'ra
 tamalatzague bë bia guixi' bayatza
 gula unëba' contra Diuzi. Lega ptasi
 bnioba' lëbë'. Lëscan' ptasi bnioba'
 ga zu Diuzi guibá. Lëscan' ptasi
 bnioba' ja ben' zulënë' na'. 7Caora
 na' lëbia guixi' snia gula bë'ba' bia
 guixi' bayatza gula lato ta tilalëba'
 ja ben' quie Diuzi hasta hueba' lëjè'
 gan. 8Na' yaca ben' nita' lao yedyi
 layu, yaca ben' bizu laojè' lë'ë lista
 ta bë Diuzi tu binecuëchinë' yedyi
 layu, uyonla'adyi'jè' bia guixi'
 bayatza gula. Lëlista napa ben'
 naca ca quie beco' ži'ila', ben' guti
 dza na'. Rguixogue'n quie ben' de
 yela' naban quie tuzioli.

9Chi zu ja ben' ruzënaga, reya'ala'
 uzëmagajë' dyë'ëdi ca rnia'. 10Chi
 nu ben' hue yaca ben' quie Diuzi
 preso, lëscan' huadyin dza gacarejè'
 preso. Chi nu ben' guti ben' quie
 Diuzi conlë espada, lëscan' conlë
 espada gatirëjè'. Quie lena', reya'ala'
 sue ben' quie Diuzi sudyi'ilëjè' Diuzi
 dyë'ëdi.

11Na'ra ude na', blë'ëda' itu bia
 guixi' bayatza gula ta broba' lu'u
 yu. Dya chopa luzuba' ca luzu
 beco' ži'ila', pero unëba' zidzo

gula. 12Na'ra ca de yela' r nabè'
 quie bia guixi' bayatza gula, bia
 blë'ëda' tanëro, lëscan' derë yela'
 r nabè' quie bia guixi' bayatza gula,
 bia blë'ëda' taorupe. Pues con ca
 mandado re'en bia nëro hue bia
 urupe, cana' rucaziba'. Caora na'
 bë bia urupe mandado tzionla'adyi'
 yugulu ben' nita' lao yedyi layu bia
 nëro, bia beyaca hue' zu guichogue
 ta guti lëba'. 13Lëscan' bëba' yela'
 milagro quieba' hasta ruquinoba'
 gui' guibá rguinon lao yedyi layu
 ta ilë'ë ja benë' len. 14Na'ra nun
 quie yela' milagro bë bia urupe
 zaquë'lao bia nëro, cana' uži'ba' yë'
 ja ben' nita' lao yedyi layu. Cana'
 bëba' mandado hue ja benë' tu ta
 naca forma quie bia nëro, bia zu
 hue' ga uchugu espada guichoba',
 pero beyacaba' zuba'. 15Na'ra bia
 urupe bëba' yela' milagro quieba',
 bëba' mandado ta inë tu ta naca
 forma quie bia nëro ta huenan
 mandado gati ja ben' birionla'adyi'
 lënan. 16Lëscan' bëba' itu mandado
 ta uzu tu sello quieba' zaquë' na'a
 yebë ja benë', o zaquë' žgajë',
 la'acazi xcuidi', la'acazi ben' huaca,
 la'acazi ben' uña'a, la'acazi ben'
 yëchi', la'acazi ben' nada'o, la'acazi
 ben' libre. 17Lëscan', chi nu ja ben'
 bizu sello quieba', o chi bizu laoba',
 o chi bizu número quie laoba', na'ra
 bisaque' ga'ojè' bi cosa, bisaque'
 yeyuti'jè' bi cosa. 18Reya'ala' inezi
 nu ben' rioñe'e cabë' nan niga. Chi
 nacale ben' rioñe'e, ulelaba ca naca
 número quie lëbia guixi' bayatza
 gula. Lënumero na' nacan número
 quie tu be'mbyu. Cani naca número
 quieba': Xopa gayuhua tzona galo
 xopa naca número quieba'.

**Rula tu gayuhua chopa galo
tapa mila benë' tu canto cubi**

14 Na'ra ude na', una'a blë'ëda' ben' naca ca quie beco' ži'ila'. Zënë' ga zu tu ya'a laona ya'a Sión. Zëlënë' tu gayuhua chopa galo tapa mila benë'. Blë'ëda' žga ja ben' na' zu lao ben' naca ca quie beco' ži'ila', lëscan' zu lao xuzinë'.² Na'ra beda' ca tu rchi' yao že gula uyëzin guibá. Naca rchi'n ca tu rchi' yesa cati rëpin ratzon fuerte gula. Lëscan' naca rchi'n ca rchi' zë ja ben' ruxidyí ja arpa.³ Caora na' beda' rula ja ben' na' tu canto cubi. Zëjë' zaquë'lao lao xlato Diuzi ga zu yaca ben' naca ca forma bia guixi' len ja ben' gula. Ni tu ja ben' tula biraca gula ca tacubi rula ja ben' na'. Tuzi ja ben' naca tu gayuhua chopa galo tapa mila, ja ben' psela Diuzi de entre ja ben' nita' lao yedyi layu, tuzi lëjë' racajë' rulajë' tu tacubi.⁴ Ni tu lasa bigusilëjë' nigula binaca žgulajë'. Bibi xquia napajë'. Na'ra rnaojë' ben' naca ca quie beco' ži'ila' con gatezi zionë'. Psela Diuzi lëjë' de entre ja ben' nita' lao yedyi layu cuenda gacajë' ben' nëro, ben' naca gun quie Diuzi lënë' ben' naca ca quie beco' ži'ila'.⁵ Ni tu di'idza' huizi' yë' biunajë'. Ni tu xquia binapajë' zëjë' zaquë'lao lao xlato Diuzi.

**Ni rnan quie di'idza' udixogue'
tzona lao ángel ja benë'**

⁶ Na'ra blë'ëda' itu ángel rzënë' ladza gatzo guibá. Rguixogue'në' ben' nita' lao yedyi layu xti'idza' Diuzi. Lëdi'idza' na' nacan tali tuzioli. Rguixogue'në' ben' quie

yugulute nación, len ben' quie yugulute ren, len ben' quie yugulute cue' di'idza', len ben' quie yugulute yedyi.⁷ Caora na' una ángel na' zidzo gula unë' cani:

—Reya'ala' gapale Diuzi bala'ana huelenë' ben' že, como dan' abdyin hora huenë' juicio. Reya'ala' tzionla'adyi'le Diuzi, ben' bë guibá, len yedyi layu, len nisadao', len ga rlë nisa.

⁸ Na'ra una itu ángel unë' cani:

—Aoca quie Babilonia, aoca quie Babilonia, porque naca ciudad Babilonia ca quie tu nigula ru'e ben' nita' lao yedyi layu vino ta yo'ojë' ižudyijë' huelëjë' lëbë' tabayatza gula.

⁹ Na'ra una ángel uyune. Unë' zidzo gula unë' caniga:

—Con nu ben' tzionla'adyi' lëbia guixi' bayatza gula, o chi tzionla'adyi'jë' tu ta naca ca forma quieba', chan' hueljë' lato su marca quieba' lao žgajë', o chi lao na'ajë',¹⁰ caora na' hue Diuzi lëjë' tu castigo huala gula. Lega idza' Diuzi lëjë' biyeyëchi'la'adyi'në' lëjë'. Huayeyjë' conlë gui' len itu gui' ra'ala' laona azufre. Huayeyjë' zaca'lao lao ángel quie Diuzi len ben' naca ca quie beco' ži'ila'.¹¹ Huayasa dzen ga tzejjë' tuzioli. Yugu dza, yugu yela, bide huezila'adyi' quie ben' uyonla'adyi' lëbia guixi' bayatza gula len ben' uyonla'adyi' tu ta naca ca forma quieba', ben' bë' lato uzu marca quieba' cabë' laoba'.¹² Quie lena' nu ben' naca ben' quie Diuzi, ben' rue ca mandado ruenë', ben' nao xneza Jesús du guicho du la'adyi', reya'ala' cuezajë' dyë'ëdi, reya'ala' gacajë' ben' de paciencia.

¹³Na'ra beda' tu rchi' benë' uyëzin guibá. Unë' në'ëdi' caniga:

—Bzu lë'ë guichi cabë' nia' caniga: “Huaca huen quie ben' baguti, ben' bë quie xti'idza' Diuzi. Desde na'a sulao huaca huen quiejë'.” Lëscan' una Bichi Be quie Diuzi cani: “Huaca huen quiejë'. Huezila'adyi'jë' abeyuyi cabë' dyin quie Diuzi bëjë'. Cabë' unaojë' quie Diuzi dza udajë' lao yedyi layu, lena' rulu'en nacajë' ben' quie Diuzi.”

Bezi' Diuzi cosecha quie yedyi layu

¹⁴Na'ra una'a blë'ëda' tu beo bezëri. Lao beo na' ure' tu ben' naca bichi yugulu benëchi'. Zu tu corona de oro guichonë'. Zënë' tu espada leco ta neduchi'tzague.

¹⁵Na'ra bero itu ángel ga zu Diuzi guibá. Unënë' zidzo rulidzanë' ben' re' lao beo unë' caniga:

—Conlë espada leco quio' ichugulo' yeziu' cosecha, como dan' abdyin hora bara cosecha de lao yedyi layu. ¹⁶Na'ra conlë espada leco quie ben' re' lao beo, uchugunë' bezi'në' cosecha quienë' de lao yedyi layu.

¹⁷Na'ra bero itu ángel ga zu Diuzi guibá. Zërënë' itu espada leco ta neduchi'tzague. ¹⁸Na'ra bero itu ángel ga zu ru'aba quie Diuzi guibá, ben' r nabë' quie gui'. Unënë' zidzo gula blidzanë' ben' zë espada leco ta neduchi'tzague rëbinë' lëbë' cani:

—Ichugo' žiza bedzuli' de lao yedyi layu como aranan.

¹⁹Na'ra uchugo ángel na' žiza bedzuli' de lao yedyi layu. Uži'në' cosecha žiza bedzuli' bdze'në'n lu'u pilo ta isinë' nisa quien. Cabë' guca quie žiza bedzuli', cana' hue Diuzi

quie ja benë' dza huenë' juicio.

²⁰Na'ra bzi žiza bedzuli' na' nisa quien ru'a yedyi na'. Caora na' bro ren zila gula ru'a pilo. Tanto bro ren ure'n tasibi ca tu sibi naca ru'a caballo. Cana' ure'n sibi tzona gayuhua kilómetro. Tu cana' ure'n yela' že quien.

Nu'a ja ángel zelao gadyi castigo

15 Na'ra blë'ëda' itu seña taže guibá ta naca ta yebanero: Blë'ëda' igadyi ángel nu'ajë' gadyi cue' castigo ta naca ga zelaozi gadyi castigo. Zelao na' iyudyi yela' rdza' quie Diuzi.

²Lëscan' blë'ëda' tu ta naca ca nisadao', pero rna'n ca yaohuan ta yu'u gui'. Blë'ëda' zë ja ben' lao nisadao' na', ja ben' uzue biuyonla'adyi'jë' lëbia guixi' bayatza gula. Lëscan' biuyonla'adyi'jë' tu ta naca ca forma quieba', bibëjë' lato sujë' número quieba' ta bigaca quieba' lëjë'. Napajë' arpa ta bë' Diuzi lëjë'.

³Na'ra rulajë' tu ta bila Moisés dza na'. Lëscan' rularëjë' tu ta rula ben' naca ca quie beco' ži'ila' na'. Lena' rnan cani:

Yugulu ta bëlo' nacan tahuen gula, nacan ta yebanendo', Señor.

Diuzi quiendo' luë', naco' ben' de yugulute yela' huaca quie. Puro tali, puro ta naca dugalo naca quio'.

Luë' r nabë'lo' yugulu nación.

⁴Reya'ala' tzionla'adyi' yugulu ja benë' luë', Señor.

Reya'ala' hue yugulu ja benë' luë' ben' že.

Tuzi luë' naco' ben' la'iya.

Huida yugulu ja ben' nita' lao yedyi layu ta tzionla'adyi'jè' luè', porque blè'èjè' ruelo' puro ta naca tali.

⁵Ude beyudyi na', una'a blè'èda' neyalo idao' ga zu Diuzi guibá. Blè'èda' ru'aba ga nudze'jè' tabla yo ga zu di'idza' ley quie Diuzi. ⁶Lu'u idao' na' bro igadyi ángel. Nu'ajè' gadyi cue' castigo. Nacojè' la'ari' yèri gula ta raca titi'. Yu'u cinta de oro ru'achu'ujè'. ⁷Na'ra blè'èda' tu ben' naca forma ca bia guixi' bè'nè' gadyi ángel tu huio copa de oro ta yudzu castigo huala gula ta hue Diuzi, ben' zu tuzioli. ⁸Na'ra yela' huaca quie Diuzi bedza' dzen lu'u idao' quienè'. Na' nunu saque' tzu'u lu'u idao' na' tu bineyudyi hue Diuzi gadyi castigo ta nu'a gadyi ángel.

Ni rnèn quie gadyi copa yudzo castigo

16 Na'ra beda' rchi' tu benè' unènè' zidzo gula lu'u idao' na'. Unè' rëbinè' gadyi ángel cani: —Uletzio uletzelato copa ta yudzo castigo huala gula quie Diuzi lao yedyi layu.

²Na'ra uyo ángel nëro yelatonè' copa quienè' lao yedyi layu. Caora na' yugulu ben' zu marca quie bia guixi' bayatza gula, ben' uyonla'adyi' tu ta naca forma quieba', ulè yèdzo' bèrè' mala gula lèjè'. Lega castigo gula gucajè'.

³Na'ra uyo ángel urupe yelatonè' copa quienè' lao nisadao'. Caora na' beyaca nisadao' na' ca ren quie ben' huati, lëscan' guti yugute bia yu'u neban lu'unan.

⁴Na'ra uyo ángel uyune yelatonè' copa quienè' lu'u ja yao len ga

rlè nisa lao yedyi layu. Caora na' beyaca nisa na' ca ren. ⁵Lëscan' beda' unè itu ángel, ben' r nabè' nisa de lao yedyi layu unè' cani: —Tahuen gula ruelo' rchugobè'lo' quie ja benè'. Luè' naco' Diuzi, ben' la'iya. Luè' naco' ben' azucazi desde tiempote. ⁶Nacan ta yu'u ni'a xnezi babèlo' quiejè', como dan' bëtijè' blatojè' ren quie yaca ben' naca la'iya quio', blatojè' ren quie ben' udixogue' xti'idzo' dza na'. Na'ra luè' bao' mandado yo'ojè' nisa ren na'a. Pues cana' reya'ala' gaca quiejè'.

⁷Lëscan' beda' unè itu ben' zu ru'aba unè' caniga:

—Xuzindo' Diuzi. Luè' naco' ben' de yugulute yela' huaca quie. Nacan ta yu'u ni'a xnezi cabè' babèlo' baochugubè'lo' quiejè'.

⁸Na'ra uyo ángel udape yelatonè' copa quienè' lao obidza. Caora na' bè' Diuzi lèbè' fuerza ta uzeinè' yaca ben' nita' lao yedyi layu. ⁹Na'ra uyeitzaguejè', pero bibetza'jè' pensari quiejè', bibèjè' Diuzi ben' že, den' ptasi bniolajè' Diuzi, ben' rue ca castigo raca quiejè'.

¹⁰Na'ra uyo ángel ga'yo' yelatonè' copa quienè' lao xlato bia guixi' bayatza gula. Caora na' bega'n chula lato ga r nabè'ba', lëscan' udi'in ja benè' ludyijè' tanto ulajè'. ¹¹Pero bibetza'jè' pensari quiejè' ta bira huejè' cabè' naca tamala ruejè', den' ptasi bniolajè' Diuzi, ben' zu guibá, nun quie dan' lega ulajè' uzujè' yedzo' bèrè'.

¹²Na'ra uyo ángel xopa yelatonè' copa quienè' lu'u yao že laona Eufrates. Caora na' beyu'e nisa quie yao na', beyacan layu bidyi cuenda

uyalo tu neza ga ude ja soldado
quie rey, ben' za' zaca' rlë ubidza.

¹³Na'ra blë'ëda' bro tzona bichi
be mala nacajan forma ca quie'dzo'.
Brojaba' lu'u ru'a bia guixi' snia
gula, bia naca Satanás. Lëscan'
brojaba' lu'u ru'a bia guixi' bayatza
gula. Lëscan' brojaba' lu'u ru'a
ben' rguixogue' di'idza' huezi'
yë'. ¹⁴Na'ra lëja bichi be mala na',
nacajan bichi be quie taxi'ihui'.
Ruejan seña, ruejan yela' milagro.
Na' riojan retupajan ja rey, ben'
nita' lao yedyi layu, ta yedupajë' tu
dza bzu Diuzi, dza belatzeque, dza
cati tilalëjë' Diuzi, ben' de yugulute
yela' huaca quie.

¹⁵Na'ra una Jesucristo: “Gapale
cuidado, porque tu sasazi yeguida'
ba'ala'cazi raquele biyeguida'.
Huaca huen quie ben' zu rbeza
në'ëdi' cati yeguida', porque ben'
birbeza në'ëdi', naca quienë' ca
quie ben' rasi, ben' biracabë' tu
sasazi idyin ben' uban žan yu'u
quienë'. Huele listo cuezale në'ëdi'
dyë'ëdi' cuenda bigaca yela' stu'
quiele cati idyin hora yeguida'.”
Cana' una Jesucristo. ¹⁶Caora na'
betupa ja bichi be mala quie ja rey
nita' lao yedyi layu tu lugar ga lao
Armagedón di'idza' hebreo.

¹⁷Na'ra uyo ángel gadyi yelatonë'
copa quienë' ladzazi. Caora na'
desde lu'u idao' zu guibá ga zu
xlato Diuzi, na'te bro tu rchi' bene'
unanë' caniga:

—Aoca.

¹⁸Caora na' uyëpi yesa, gotzo
bdyito hueziu', lëscan' guca užu'
fuerte gula. Na' lega psisin yedyi
layu. Ni tu lasa binežu' fuerte gula
cabë' užu' huala gula guca. Tu

lala nita' ja benë' lao yedyi layu,
binegacacazi cana'. ¹⁹Aodyiagui'
lëyedyi belaotera, na' gucan tzona
cue'. Aozuri' ja ciudad de lao yedyi
layu. Caora na' beza'la'adyi' Diuzi
quie ciudad Babilonia, ciudad
belaotera. Bë Diuzi castigo huala
gula quie ben' ciudad Babilonia
nun quie lega bdza'në' cabë' bë ja
ben' ciudad na'. ²⁰Lëscan' abeyula
ga de yu bidyi lu'u nisadao', lëscan'
abeyula yugulu ya'a. ²¹Gusi' yo
hueziu' yela gula guibá. Gusi'n lao
ja ben' nita' lao yedyi layu. Naca
yela' zi' quien chopa galo kilo tu
tun. Pero ptasi bniola ja benë' Diuzi
nun quie dan' besi'në' yo hueziu'
gucajë' tu castigo huala gula.

**Bë Diuzi castigo tu nigula
bayatza, nigula ruti' gusto quie**

17 Caora na' bida tu ángel,
ben' naca gadyi ben' yelato
gadyi copa unanë' në'ëdi' caniga:
—Uda, ulu'ena' luë' cabë' castigo
gaca quie nigula bayatza gula,
nigula ruti' gusto quie, ben' re' lao
nisadao'. ²Na'ra ja rey na', ben'
nita' lao yedyi layu, bëlëjë' lëningula
na' tabayatza gula, ta bireya'ala'
huelëjë' lëbë'. Lëscan' ja ben' nita'
lao yedyi layu, ahue'ejë' vino
quienë' užudyijë' bërëjë' tabayatza
gula ta bireya'ala' huelëjë' lëbë'.

³Na'ra dyin quie Bichi Be quie
Diuzi guca quia' ca ben' uxusa
blë'ëda' tu ángel uquië'në' në'ëdi' tu
lao lato ga bidyia yu'u. Na' blë'ëda'
dya tu nigula xcu'udzu tu bia
guixi' nacaba' žna. Blë'ëda' dya
laoba' di'idza' ta rutasi runioba' lao
Diuzi. Blë'ëda' zu gadyi guichoba',
lëscan' dya chi luzuba'. ⁴Na'ra

lënigula na' naconë' tu vestido naca culuri tamorado len tažna. Naca tza'onë' conlë oro, len yo tzao', len perla. Lëscan' zënë' tu copa de oro ta yudzu ta naca bayatza gula cabë' bëlënë' ja be'mbyu. ⁵Na'ra žga nigula na' zu letra rguixogue'n cabë' laohuë', pero negachi'zi naca laohuë'. Cani rnën lë'ë žganë':

“Në'ëdi' laohua' Babilonia. Naca' žna' yugulu nigula bayatza, nigula ruti' gusto quie. Naca' žna' yugulu ta naca mala gula de lao yedyi layu.”

⁶Na'ra blë'ëda' raca tondo guicho nigula na' ca raca tondo guicho ben' žudyi. Raca tondo guichonë' nun quie dula' quienë' ulato ren quie ja ben' quie Diuzi, len ja ben' udixogue' xti'idza' Jesús. Pues dula' quienë' gutijë'. Caora blë'ëda' ca naca quienë', lega bebaneda'. ⁷Na'ra unë ángel na' në'ëdi' cani:

—¿Bixquien' lega rebanelo'?

Na' uzioñe'eda' luë' cabë' naca ta negachi' quie nigula na', len quie bia guixi', bia dyia nigula na', bia zu gadyi guichogue, bia naca chi luze. ⁸Lëbia guixi' blë'ëlo', nacaba' bia uzu dza na'te, pero bira zuba' na'a, pero huaroba' lu'u pozo zitu' gula ga yu'uba'. Bë' yeyudyi na', te quieba' tuzioli. Huebane ja ben' nita' lao yedyi layu, ja ben' bizu laohue lu'u libro ta naca lista quie ben' de yela' neban quie tuzioli. Desde dza cati ure' dyilayu bizu laojë' lë'ë lista. Huebanejë' cati ilë'ëjë' lëbia guixi', bia uzu dza na'te, pero bira zuba' na'a, pero huaroba' yezuba' tatula.

⁹Ni rnia' tu di'idza' para nu ben' tzioñe'e len. Rnia' lëgadyi guicho bia guixi' rnërën quie gadyi ya'a ga

dyia nigula na'. ¹⁰Lëscan' lëgadyi guichoba' rnërën quie gadyi rey. Na'ra quie ga'yo' rey na' abeyudyi bedu quiejë'. Itunë' rnabë'në' na'a. Itunë' nerdzioguera idyin dza inabë'në'. Cati idyin dza inabë' zelao ben' gadyi, biinabë'në' zi dza. ¹¹Na'ra lëbia guixi', bia uzu dza na'te, pero bira zuba' na'a, lëba' huaroba' gacaba' xuna rey. Entre laguedyi gadyi ben' rey, huaroba' gacaba' rey xuna, pero bë' yeyudyi na', te quieba' tuzioli.

¹²Quie lao chi luzuba' ta blë'ëlo', lenan rnërën quie chi rey, ben' binesulao inabë'. Huacajë' rey, pero tu chi'zi inabë'jë' len lëbia guixi'.

¹³Na'ra lao chi rey na' huazujë' de acuerdo ta hue'jë' lëbia guixi' na' yela' rnabë' quiejë' ta inabë'ba'.

¹⁴Caora na' huadilalëjë' ben' naca ca quie beco' ži'ila', pero hue ben' naca ca quie beco' ži'ila' gan. Huenë' gan como dan' naquë' xan' yugulu ben' rnabë', lëscan' naquë' xan' yugulu ben' naca rey. Ulio Diuzi pserenë' yaca ben' naca ben' quienë'. Nacajë' ben' bipsan unao xnezë'.

¹⁵Lëscan' una ángel na' në'ëdi' caniga:

—Nisadao' ta blë'ëlo' gan' dyia nigula bayatza gula, nigula ruti' gusto quie, lena' rguixogue'n quie ja ciudad, len quie ja benë', len quie ja di'idza' len quie ja nación.

¹⁶Na'ra quie chi luzu bia guixi' naca rey ta blë'ëlo', lëyaca rey na' udiejë' nigula bayatza gula, nigula ruti' gusto quie. Usanla'adyi'jë' lëbë'. Hualëchojë' žabanë' ta tanë' du ga'ala' guidinë'. Lëscan' gaojë' bë'ëla' žuba' quienë', na' uzejjë'

cuerpo quienè'. ¹⁷Cabè' re'en Diuzi gaca, cana' udze'nè' pensari lu'u guicho laxta'ojè' ta huejè' quienè' cabè' re'ennè', la'acazi biracabè'ljè' chi Diuzi hue quiejè' cana'. Quie lena' huazujè' de acuerdo hue'ljè' yela' r nabè' quiejè' lao na'a bia guixi' ta gacaba' rey inabè'ba' lèjè'. Cana' gaca quiejè' hasta izu di'idza' cabè' una Diuzi. ¹⁸Na'ra lè'nigula na' blè'èlo', naquè' lè'yedyi belaotera ga r nabè'ljè' ja rey nita' lao yedyi layu.

Aoca quie ciudad Babilonia

18 Na'ra ude beyudyi na', blè'èda' itu ángel, ben' detzague yela' r nabè' quie, uyèzinè' guibá. Na'ra tantozi naquè' raca titi', uyu'u xni' quienè' lao yedyi layu. ²Caora na' unè' ángel na' zidzo unanè' caniga:

—Aoca quie Babilonia, aoca quie Babilonia. Naca Babilonia ciudad belaotera, pero abeyacan ciudad ga rda ja taxi'ihui!. Abeyacan ca beló ga yu'u yugu cue' bichi be mala. Abeyacan lidyí ja bia mala gula, bia rzè ladza, bia naca bayatza gula. ³Cana' guca quie Babilonia, como dan' naca ciudad Babilonia ca quie tu nigula mala, nigula ruti' gusto quie. Ahue'e ben' quie yugulu nación vino quienè'. Bèlèjè' lèbè' tabayatza, ta bireya'ala' huelèjè' nigula. Lèscan' ja rey nita' lao yedyi layu, bèlèjè' lèbè' tabayatza gula, ta bireya'ala' huelèjè' nigula. Lèscan' ja ben' yu'u huèti', ben' nita' lao yedyi layu, beyacajè' ben' uña'a gula nun quie dan' bèrèlèjè' nigula na' tabayatza gula, ta bireya'ala' huelèjè' nigula.

⁴Na'ra beda' tu rchi' itu ben' zu guibá. Unanè' cani:

—Le'e ben' naca ben' quia!. Ulero ciudad na' tacuenda bihuerèle cabè' dula' xquia ruejè', ta bigaca quiele cabè' castigo gacajè'. ⁵Tantozi baoye dula' xquia quiejè', una Diuzi abdyin dza huenè' lèjè' castigo. ⁶Abdyin dza gaca nigula na' castigo lèbi ca castigo bènè' ja ben' tula. Chopa tantola huele nigula na' castigo quie cabè' tamala bènè'. Hue'le nigula na' ta yo'onè' chopa tantola ta naca sla' cabè' ta bè'nè' hue'e ja ben' tula. ⁷Lèbizi ca bènè', bènè' cuinnè' ben' že, lèbizi ca guquè' ben' uña'a nun quie bènè' tabayatza, cana' huele nigula na' castigo ta yedzagalaotzeguenè'. Cani rna nigula na' lu'u guicho laxta'onè': “Ni ri'a. Naca' ben' r nabè'. Binaca' nigula guti xquiuhue. Bisaca'yudyicaza.” Cana' rnanè'. ⁸Quie lena' tu sasazi gata' castigo quienè!. Tu sasazi gata' yela' guti quienè!. Tu sasazi gata' yela' rla quienè!. Tu sasazi gata' yela' rdue quienè!. Na' huayeinè' conlè gui' como dan' naca Diuzi ben' de yela' huaca quie baochugulinè' quienè!. ⁹Huabedyi ja rey, ben' nita' lao yedyi layu, ben' bèlè lèbè' tabayatza. Huabedyiya'ljè' cati ilè'èjè' rasa dzen ga reinè!. ¹⁰Na'ra yega'n ja rey na' zitu' nun quie rdzebijè' cabè' castigo raca nigula na' inajè' caniga:
—iAy! iBayèchi' gula raca quie ben' ciudad Babilonia! Ciudad že, ciudad belaotera naca ciudad Babilonia, pero tu sasazi bla' castigo quiejè'.

¹¹Lëscan' huabedyi ja ben' yu'u huëti', ben' nita' lao yedyi layu. Huabedyijë' nun quie aodyiagui' lëciudad na'. Huabedyiya'jë' como dan' bira nita' nu ja ben' ga'o ta nu'ajë' ruti'jë' ¹²ta nu'ajë' oro, ta nu'ajë' plata, ta nu'ajë' yo tza'o', ta nu'ajë' perla, ta nu'ajë' la'ari' fino gula taculuri morado len taculuri žna. Lëscan' bira nita' nu ja ben' ga'o ta nu'ajë' yugu cue' ja yaga rla' žixi žeo, ta nu'ajë' marfil, ta nu'ajë' yaga fino, ta nu'ajë' bronce, ta nu'ajë' guibá, ta nu'ajë' mármol. ¹³Lëscan' bira nita' nu ja ben' ga'o ta nu'ajë' canela, ta nu'ajë' rchinlaza, ta nu'ajë' yalo, ta nu'ajë' aceite mirra len aceite tula ta rla' badan gula, ta nu'ajë' vino, ta nu'ajë' aceite olivo, ta nu'ajë' yezo fino, ta nu'ajë' trigo. Lëscan' nequiëljë' bia ru'a yua', nequiëljë' beco' ži'ila', nequiëljë' caballo, nusa'jë' carreta, hasta nequiëljë' benë' ta yeyuti'jë'. ¹⁴Na'ra cani ina yaca ben' huëti' rëbijë' yaca ben' ciudad na':

—Bira de tažixi cabë' tažixi lega yaxele dza na'. Aode quie yela' uña'a quiele, aode quie tafino ta de quiele dza na'.

¹⁵Na'ra ja ben' ruti'ja tana', ben' guca ben' uña'a nun quie bëjë' huëti' ciudad na', bira tziojë' ga'ala' ga re' ciudad na'. Huega'një' zitu' nun quie rdzebijë' quie castigo raza ja ben' ciudad na'. Huabedyijë' huaquejë' bayëchi'. ¹⁶Cani inajë':

—iAy! iBayëchi' gula raza quie ciudad na'! Guca ciudad na' ca quie tu nigula naco tu la'ari' fino de culuri morado len culuri žna. Guca ciudad na' ca quie tu nigula

naca tza'o' con oro, len yo tza'o', len perlas. ¹⁷Pero tu sasazi aoniti yela' uña'a quienë'.

Na'ra yugulu ben' naca xan' barco, len ben' naca pasajero quiejë', len ben' rue dyin quie barco, len ben' huëti', ben' rse'ela' ja yua' quie ta tzion yedyi tula, caora na' bira tziojë' ciudad na' huega'një' zitu'. ¹⁸Cati ilë'ëjë' rasa dzen rei ciudad na', na'ra huabedyiya'jë' inajë' caniga:

—iBira de ciudad belaotera ca ciudad niga!

¹⁹Na'ra udze'jë' yu guichojë', huabedyijë' gaquejë' bayëchi', cuedyia'jë', inajë' caniga:

—iAy! Bayëchi' gula raza quie ciudad na'. Conlë yela' uña'a quie ciudad na' beyaca ben' naca xan' barco ben' uña'a. Pero na'a tu sasazi aode quie ciudad na'.

²⁰Pero le'e ben' zu guibá, len le'e ben' naca apóstol, len le'e ben' rguixogue' xti'idza' Diuzi, len le'e yugulu ben' naque quie Diuzi, reya'ala' yedaohuele cabë' guca quie ciudad na', como dan' castigo bë Diuzi ciudad na'. Cana' apquizu Diuzi lëjë' cabë' tamala bëjë' quiele.

²¹Na'ra blë'ëda' ulisa tu ángel hua'ala' tu yo ta naca ca yo že cabë' ta rutujë' žuba'. Blë'ëda' uru'unnë'n lu'u nisadao'. Na' unë' cani:

—Lëbizi cabë' guca quie yo že, cana' gaca quie ciudad Babilonia. Tu sasazi te quien, bira ilë'ë yaca benë' len. ²²Bira uxidyi ja benë' arpa, bira ucuedyi ja benë' flauta, bira ucuedyi ja benë' trompeta, bira huejë' música lao calle ciudad na'. Nitu nitu ben' hue dyin, bira inita'jë' ciudad na'. Bira gutu molino yo,

²³ bira useni! lámpara gui!, bira gaca ru'be lani quie huetzagana! ciudad na'. Cana! gaca quie ciudad na' la'acazi ben' yu'u hueti! quie ciudad na', gucajè! ben' belaora lao yaca ben' nita! lao yedyi layu, pero uži!jè! ben' quie yugulu nación yè! conlè yela! brujo quiejè!

²⁴ Na'ra lèciudad na' nacan ciudad ga bëtijè! blatojè! ren quie ben' udixogue! xti'idza! Diuzi len yaca los demás ben' naque quienè!. Blatojè! ren quie yugulu ben' unao xneza Cristo.

19 Na'ra ude beyudyi na' beda' rchi! ja ben' zè, ben' zu guibá, unèjè! zidzo gula caniga:

Naca Diuzi ben' že.

Tuzi Diuzi quiero uselanè! ra'o.

Tuzi Diuzi quiero de yela' bala'ana quienè!.

Tuzi Diuzi quiero de yela' r nabè! quienè!.

² Cana! naca quienè!, como dan' rchugulinè! ta yu'u ni'a xnezi, rchugulinè! ta naca tali.

Pues aochugulinè! quie nigula bayatza gula, nigula ruti! gusto quiè, nigula psèdi ja ben' nita! lao yedyi layu, na' bèjè! tabayatza gula cabè! psèdinè! lèjè!.

Bapquižu Diuzi lènigula na' cabè! bènè! bëtiné! ja ben' quie Diuzi.

³ Caora na' benajè! tatula:

—iNaca Diuzi ben' že! Tuzioli raza dzen ga rei nigula na'.

⁴ Na'ra galobetapa ja ben' gula, len tapa ben' naca forma quie bia guixi!, gutajè! uzu ru'ala layu uyonla'adyi!jè! Diuzi, ben' re' lao xlatogue. Na'ra unajè! cani:

—iCana! nacan! iNaca Diuzi ben' že!

⁵ Na'ra beda! itu rchi! benè!, ben' zu cuèta xlató Diuzi, unènè! caniga: Huele Diuzi ben' že, yugulu le'e ben' rue ca mandado ruenè!. Huele Diuzi ben' že, yugulu le'e ben' rionla'adyi! lèbè!, len le'e ben' cuidi!, len le'e ben' huaca.

Ni rnèn quie lani quie huetzagana! quie ben' naca ca quie beco' ži'ila!

⁶ Lèscan! beda! itu rchi! ja ben' zè. Unèyaquè! cabè! rnè ja yao že, lèscan! cabè! rnè bdyito hueziu! fuerte. Unajè! caniga:

iNaca Diuzi ben' že!

Abdyin dza tuzi lèbè! r nabè!nè!.

Naca Diuzi quiero ben' de yugulute yela' r nabè! quie.

⁷ Yedaohuetzeguero, suro gusto gula, hueronè! ben' že, como dan' abdyin hora quie huetzagana! quie ben' naca ca quie beco' ži'ila!.

Azu nigula gaca žgulanè!, rbezanè! utzagana!lènè! lèbè!.

⁸ Bè! Diuzi lèbè! la'ari! fino gula, la'ari! yèri gula, la'ari! raca titi! ta gaconè!.

Lèla'ari! fino gula rnèn quie ben' naque quie Diuzi nun quie bè quiejè! ca re!en Diuzi huejè!.

⁹ Na'ra una ángel na' nètèdi! caniga:

—Bzu di'idza! lè'è guichi cani:

“Tahuen gula nacan quie ja ben' guida lani quie huetzagana! quie ben' naca ca quie beco' ži'ila!”

Lèscan! unè! nètèdi! cani:

—Cabè! di'idza! rnia! luè! nacan di'idza! quie Diuzi.

¹⁰ Na'ra uditzoga! žiba! lao ángel na' ta tzionla'adya! lèbè!, pero unè! nètèdi! caniga:

—Bihuelo' cana'. Tuzi Diuzi reya'ala' tzionla'adyo'. Nacaria' ben' rue bi mandado hue Diuzi nē'ēdi' cabē' ruelo' luē', len ja ben' bicho', ben' rguixogue' xti'idza' Jesús. Pues nu ben' rguixogue' xti'idza' Jesús, yu'ujē' Bichi Be ca Bichi Be yuyu' ja ben' udixogue' xti'idza' Diuzi tiempote.

**Ni rnan quie tu ben' dyia
caballo bezēri**

¹¹Na'ra blē'ēda' uyalo guibá, blē'ēda' tu caballo bezēri dyia benē' lēba'. Na'ra ben' dyia lēba' laonē' cani: “Ben' ruzu di'idza', ben' rue puro tali.” Cana' laonē', como dan' puro ca re'en Diuzi huenē', cana' ruenē'. Cana' r nabē'nē' rdilalēnē' ben' raca condra Diuzi. ¹²Lēben' dyia caballo bezēri, na' yu'u yulaohuē' ca gui'. Yu'u guichonē' coron zē. Zu letra lē'ē coron quienē' cabē' laohuē', pero tuzi lēbē' nezinē' cabē' laonē'. ¹³Na'ra naconē' tu la'ari' nela'o ren. Lēscan' laonē': “Xti'idza' Diuzi.” ¹⁴Na'ra unao yugulu ben' zu guibá ben' na'. Lēscan' nacojē' la'ari' fino gula, la'ari' yēri bezēri. Lēscan' dyiajē' ja caballo bezēri. ¹⁵Bro tu espada neduchi' gula lu'u ru'a ben' na'. Conlē len rguinē' ja ben' quie ja nación nita' lao yedyi layu. Inabē'nē' lējē' zi'laza gula. Huachugulinē' quiejē' tali gula. Gaca quiejē' ca quie žiza bedzuli' ta blio ja benē' uzin. Yela' rdza' quie Diuzi, ben' de yugulute yela' huaca quie, huenē' lējē' castigo huala gula. ¹⁶Na'ra blē'ēda' zu letra lē'ē žabanē' len sunnē' ga rguixogue'n bi laonē'. Cani laonē': “Ben' r nabē'ra ca ja rey, ben' r nabē'ra ca ja ben' r nabē'.”

¹⁷Na'ra blē'ēda' tu ángel nulioguē' lao obidza uredyiya'nē' fuerte gula gužinē' yugulu bia rzē ladza. Unē' caniga:

—Uleda, idupale ta gaole rtze' quie Diuzi. ¹⁸Uleda ta gaole bē'ēla' žuba' quie ja rey, len quie ja xan' soldado, len quie ja ben' naca tzutzu huala, len quie ja caballo, len quie ja soldado dyia caballo, len quie ja ben' zē. Gaole bē'ēla' žuba' quiejē', la'acazi ben' libre, la'acazi ben' nada'o, la'acazi ben' yēchi', la'acazi ben' belao.

¹⁹Na'ra blē'ēda' lēbia guixi' bayatza gula, lēscan' blē'ēda' ja rey nita' lao yedyi layu len ja soldado quiejē'. Babedupajē' ta tilalējē' ben' dyia caballo bezēri len ja ben' nao lēbē'. ²⁰Na'ra ben' dyia caballo bezēri len ben' nao lēbē', bējē' bia guixi' bayatza gula len ben' rguixogue' di'idza' huezi' yē' preso. Lēben' huezi' yē' naquē' ben' bē seña, bēnē' yela' milagro uži'nē' yē' ja ben' bē lato uzu marca quie bia guixi' bayatza gula. Lējē' uyonla'adyi'jē' tu ta naca ca forma quie bia guixi' bayatza gula. Na'ra ben' dyia caballo bezēri len ben' nao lēbē', uru'unjē' bia guixi' bayatza gula len ben' rguixogue' di'idza' huezi' yē' lu'u gui' že naca ca lagun ga yu'u tu ta lao azufre ta lega ra'ala' gui'. Du nebanjē' aoru'unjē' lējē' lu'u gui' na'. ²¹Na'ra ben' dyia caballo bezēri bētinē' ja ben' bega'n, ben' naca rey len soldado quiejē'. Conlē espada neduchi' bero ru'anē', conlē len bētinē' lējē'. Na'ra bla' ja bia rzē ladza udaojaba' bē'ēla' žuba' quiejē' belojaba'.

Ni rnan quie tu mila iza

20 Ude beyudyi na' blè'èda' uyèzi tu ángel guibá zènè' ži'guiba quie pozo zitu' gula, lèscan' zènè' tu caden reo. ²Na'ra bèxonè' lèbia snia gula, bia naca ca bëla, bia naca xan' taxi'ihui' lao Satanás. Pquio ángel na' lèbè' lao tu mila iza. ³Baoru'un ángel na' lèbè' lu'u pozo zitu' gula gan' psioguè' lèbè', lèscan' bzunè' tu sello ru'a puerta quie pozo na' tacuenda bira si'nè' ja ben' nita' lao yedyi layu yè' lao tu mila iza. Na'ra bë' aode lao tu mila iza, cana' yeguidè' itu chi'zi.

⁴Caora na' blè'èda' re' yaca benè' lao xlatojè'. De yela' rnabè' quiejè' ta huejè' justicia. Lèscan' blè'èda' ja bichi be quie ja ben' guti dza na'. Aochugu benè' luba'jè' dza na' nun quie dan' unaojè' xneza Jesús udixoguel'jè' xti'idza' Diuzi. Biuyonla'adyi'jè' bia guixi' bayatza gula. Lèscan' biuyonla'adyi'jè' tu ta naca forma quieba'. Bibèjè' lato su marca quieba' žgajè'. Lèscan' bibèjè' lato su marca quieba' lao na'ajè'. Blè'èda' beban ja ben' na' ta inabè'jè' tuže len Cristo lao tu mila iza. ⁵Pero ja los demás ben' huati, bibebanjè' hasta aode lao tu mila iza. ⁶Naca huen gula quie ben' beban tanëro. Nacajè' ben' la'iya quie Diuzi. Tuzioli bigata' castigo quiejè', den' huacajè' pxuzi quie Diuzi len Cristo. Inabè'jè' tuže len Cristo lao tu mila iza.

⁷Bè' aode tu mila iza, na'ra bero Satanás lu'u ga yu'unè' neyeyonè'. ⁸Huaronè' ta tzexi'nè' yè' ja ben' nita' lao yedyi layu. Huazi'nè' ben' quie nación Gog len ben' quie

nación Magog yè'. Huatupanè' lèjè' ta huejè' dila. Tantozi naca soldado quiejè' ben' zè gula, una'n ca quie yožo re' ru'a nisadao'. ⁹Na'ra bedza'jè' lao yedyi layu, uyèchojè' ga negu'udi' ja ben' quie Diuzi, ta inaro uyèchojè' lèciudad nedyè'è Diuzi. Pero na'ra pchezi Diuzi gui' guibá ta bzeinan lèjè' beyudyi bedu. ¹⁰Caora na' uru'un Diuzi xan' taxi'ihui', ben' uži' yè', lu'u gui' že naca ca lagun ga yu'u azufre ta lega ra'ala' gui'. Ga uru'un Diuzi lèbia bayatza gula, len lèben' udixogue' di'idza' huizi' yè', lègan' na' uru'un Diuzi xan' taxi'ihui'. Lègan' na' ilatzeguejè' du dza, du yela, tuzioli.

Ga rue Diuzi juicio quie ben' mala

¹¹Na'ra blè'èda' xlato Diuzi ta naca bezèri. Blè'èda' nu ben' re' laona. Nun quie re' ben' na' xlatoguè', aode quie ladza, aode quie dyilayu dužeten. Ni ilè'èti'n bira bega'n. ¹²Na'ra blè'èda' ja ben' huati, ben' huaca len ja xcuidi', zèjè' zaquè'lao lao Diuzi. Na'ra usalojè' ja libro len itu libro ga yu'u lista quie ben' de yela' neban quie tuzioli. Caora na' uchuguli Diuzi quie ja ben' huati cabè' bèjè' según ca rnèn lè'è ja libro na'. ¹³Na'ra blè'èda' abedupa ben' zè, ben' huati. Abedupa ben' guti lu'u nisadao' len ben' guti con gati'tezi gan' zujè' rbezajè'. Uchuguli Diuzi quiejè' cabè' bèjè'. ¹⁴Caora na' aode quie yela' guti, aode quie gui' gabila. Beyudyi bedu quien yu'un lu'u gui' naca ca lagun. Na'ra quie nu ben' tzu'u lu'u gui' že naca ca lagun, biyeyudyi yedu gaca castigo quiejè' tuzioli. ¹⁵Yuu'u lu'u gui' naca ca

lagun nu ben' bizu laoje lu'u libro
ga yu'u lista quie ben' de yela'
neban quie tuzioli.

**Bade tu guibá cubi len
tu dyilayu cubi**

21 Na'ra ude beyudyi na',
blë'ëda' bazë tu guibá cubi
len tu dyilayu cubi. Abeyula guibá
gula len dyilayu gula. Lëscan' bira
de nisadao'. ²Në'ëdi', Juan, blë'ëda'
bayëzi tu ciudad la'iya, tu ciudad
Jerusalén cubi. Bayëzin guibá ga
zu Diuzi. Banaca ciudad na' dya'a
gula cabë' dya'a gula naca la'ari'
naco nigula caora idyin be'mbyu ta
utzagana'lënë' lëbë'. ³Na'ra beda'
rchi' benë' guibá, rnënë' zidzo gula
cani:

—Una'cara, bazu Diuzi ga nita'
ja benë'. Huazunë' len lëjë' tuže.
Huacajë' ben' quienë'. Cuin Diuzi
huazunë' len lëjë' ta nacanë' Diuzi
quiejë'. ⁴Bihue Diuzi lato gaca
tamala quiejë'. Bira gatijë', bira
cuedyijë', bira gaca bayëchi' quiejë',
bira ilajë', como dan' aode quie
yugulu tagula, babeyulan.

⁵Na'ra una Diuzi, ben' re' lao
xlatogue, unënë' cani:

—Una'cara, tacubi reyua' yugulu
ta de.

Lëscan' unë' cani:

—Bzu di'idza' lë'ë guichi cabë'
rnia', como dan' cabë' rnia' nacan
ta sudyi'ilëlo'.

⁶Ude beyudyi na' unë' në'ëdi'
cani:

—Babia' cabë' unia' hua'. Lao
na'a uzulaohua' ulëcha' yedyi layu.
Lëscan' lao na'a yeyudyi yedu quie
yedyi layu. Naca' ca quie letra A
len letra Z quie abecedario. Con nu

ben' rbili nisa, në'ëdi' hual'jë' nisa
yo'ojë', bibi si'a quien. Nisa zila rlë
ta hual'jë' yo'ojë'. Nu ben' yo'o nisa
hual'jë', nebanjë' tuzioli. ⁷Lëscan' nu
yaca ben' sue biusanla'adyi' xneza',
gaca quiejë' tadya'a gula cabë' unia'
gaca quiejë'. Huaca' Diuzi quiejë',
na' huacajë' ži'ina'. ⁸Pero cabë'
gaca quie ben' rdzebi inao xneza',
ben' bibë quie xti'idza', len ben' bë
tabayatza, len ben' bëti benë', len
ben' udalë ja nigula binaca žgule,
len ben' bë yela' brujo, len ben'
uyonla'adyi' ja idolo, len yugulu
ja ben' huezi' yë', lëjë' naca quiejë'
tziojë' lu'u gui' naca ca lagun ga
yu'u tu ta lao azufre ta lega ra'ala'
gui'. Cana' gata' castigo quiejë'
tuzioli.

**Huayëzi tu ciudad
Jerusalén cubi guibá**

⁹Na'ra bida tu ángel, ben' nacaja
gadyi, ben' zë ja gadyi copa ta
yudzo zelao gadyi castigo bë Diuzi
dza na'. Na'ra unanë' në'ëdi' cani:

—Udacara, ulu'ena' luë' cabë' naca
nigula, ben' utzagana'lë ben' naca
ca quie beco' ži'ila'.

¹⁰Na'ra dyin quie Bichi Be quie
Diuzi, guca quia' ca quie ben' uxusa.
Blë'ëda' tu ángel uquië'në' në'ëdi'
tu lao ya'a žë naca sibi gula. Na'
blu'enë' në'ëdi' lëciudad žë, ciudad
naca la'iya, ciudad Jerusalén ta
za' guibá ga zu Diuzi. ¹¹Na' raca
titi'n ca raca titi' ga zu Diuzi. Raca
titi'n ca raca titi' yo tzao' gula, ca
raca titi' yo jasje rna'n ca yaohuan.
¹²Ru'a lao ciudad na' zu tu besu
žë gula nacan tasibi ta dyian
chipchopa puerta. Na'ra zu tu huio
ángel ru'a ja puerta na'. Lëscan' lë'ë

ja puerta na' zu letra cabè' lao tu huio ja ben' Israel quie chipchopa familiajè'. ¹³Zu tzona puerta zaquè' ga rlè obidza. Lëscan' zu tzona puerta zaquè' norte, lëscan' zu itzonan zaquè' sur, lëscan' zu itzonan zaquè' ga reyen obidza. ¹⁴Na'ra uzulao besu quie ciudad na' lao chipchopa yo nacan laga'. Lëscan' lè'è yo na' zu tu huio lao ja apóstol quie lao chipchopajè', ben' naque quie ben' naca ca quie beco' ži'ila'.

¹⁵Na'ra lëángel na', ben' bē'lënē' nē'èdi' di'idza', zēnē' tu ta naca ca huenixi' de oro ta urixinē' ciudad na', len ja puerta quien, len ja besu quien. ¹⁶Blē'èda' lëciudad na' nacan cuadrado. Nacan yela' tona quien lëbizi len yela' laga' quien. Caora na' brixí ángel na' ciudad na' blē'èda' nacan tu gayuhua legua. Tu lëbizi nacan yela' tona quien len yela' sibi quien len yela' laga' quien. ¹⁷Lëscan' brixí ángel na' besu quien blē'èda' tu gayuhua chopá galo tapa žicho yela' laga' quien, según ca rurixi ja benē' como dan' cana' brixí ángel na' len.

¹⁸Blē'èda' naca besu quien de yo jaspe. Lëscan' lëciudad na' nacan puro de oro rna'n ca yaohuan yēri gula. ¹⁹Lē'è yo naca laga' ga uzulao besu na', yu'un yugu cue' yo tzao'. Na' yo laga' nēro, yu'un yo jaspe. Na' yo laga' urupe, yu'un yo safiro. Na' yo laga' uyune, yu'un yo ágata. Na' yo laga' udape, yu'un yo esmeralda. ²⁰Na' yo laga' ga'yo', yu'un yo ónice. Na' yo laga' xopa, yu'un yo cornalina. Na' yo laga' gadyi, yu'un yo crisólito. Na' yo laga' xuna, yu'un yo berilo. Na' yo

laga' ga, yu'un yo topacio. Na' yo laga' chi, yu'un yo crisoprasa. Na' yo laga' chiptu, yu'un yo jacinto. Na' yo laga' chipchopa, yu'un yo amatista. ²¹Na'ra quie chipchopa puerta na' nacajan de tu huio perla quie quien. Lëscan' naca calle belao quie ciudad na' de oro puro. Rna'n ca yaohuan yēri gula.

²²Biblē'èda' nitu idao' bizu lao ciudad na' como dan' cuin Diuzi, ben' de yugulute yela' huaca quie, zunē' lao ciudad na' len ben' naca ca quie beco' ži'ila'. ²³Lëscan' birnaban tzu'un xni' obidza ni xni' biu' ciudad na', como dan' cuin Diuzi len ben' naca ca quie beco' ži'ila' rseni'jē' nacajē' gui' quien. ²⁴Nun quie xni' quie ciudad na', hualē'è ja ben' quie ja nación ta tajē' neza quiejē'. Huida ja rey lao ciudad na' ta gapala'njē' Diuzi. ²⁵Na'ra bireyeyo ja puerta quie ciudad na' te dza. Bira rala lao ciudad na'. ²⁶Lëscan' huida ja benē' quie quie nación lao ciudad na' ta huejē' Diuzi ben' že gapala'njē' lëbē'. ²⁷Pero yaca ben' mala, len yaca ben' bayatza, len yaca ben' huezi' yē', bisaque' tzu'ujē' lao ciudad na'. Tuzi ben' zu laohue lē'è lista zu lu'u libro napa ben' naca ca quie beco' ži'ila', tuzi lējē' huazaque' tzu'ujē' lao ciudad na'. Lëlibro na' nacan ga yu'u lao ja ben' de yela' neban quie tuzioli.

22 Na'ra blu'e ángel na' nē'èdi' tu yao nacan nisa dya'a gula raca titi'n ca yaohuan yēri gula. Lënisa na' ru'en yela' neban. Na'ra rero nisa na' ga re' xlato Diuzi len ga re' xlato ben' naca ca quie beco' ži'ila'. ²Lëscan' lao tao' calle

belao quie ciudad na', de tu yao yëri gula. Itzala' huio yao na', zu ja yaga ru'e yela' neban. Rbia ja yaga na' tažixi quien chipchopa lasa tu iza, ta inaro, tu lasa tu biu'. Lëxla'aga' ja yaga na' nacan remedio ta iyaca ja ben' quie ja nación. ³Na'ra bira nudze'de' Diuzi nitu ben' zu lao ciudad na'. Lëscan' huazu xlato Diuzi len ben' naca ca quie beco' ži'ila' lao yedyi na'. Huayonla'adyi' yaca ben' quienë' lëbë'. ⁴Hualë'ëjë' ru'alao Diuzi. Badyia letra žgajë' cabë' lao Diuzi. ⁵Na'ra bira rala lao ciudad na'. Lëscan' yaca ben' zu lao ciudad na', bira inaban useni'n gui' ta ilë'ëjë', bira inaban useni' ubidza gan' zujë', como dan' cuin Diuzi useni'në' gui' quiejë' ta ilë'ëjë'. Caora na' inabë'ljë' tuzioli.

Baruen bago dza yeguida Cristo

⁶Na'ra una ángel në'ëdi' cani:

—Nacan di'idza' li ta babelo'.

Nacan ta sudyi'ilëlo'n. Caora na' use'ela' Diuzi tu ángel quienë' ta ulu'enë' ja ben' quienë' cabë' ta baza' gaca. Naca Diuzi ben' rudze' Bichi Be quienë' lu'u guicho laxta'o ja ben' rguixogue' xti'idzë' ta gacalënë' lëjë' cabë' inajë'.

⁷Na'ra tanun quie Cristo una ángel cani:

—Baruen bago dza yeguida'.

iHuaca huen quie ja ben' ruzënaga cabë' di'idza' rguixogue' libro ni!

⁸Në'ëdi', Juan, beda' blë'ëda' cabë' blu'e ángel na' në'ëdi'. Caora cati beyudyi beda' blë'ëda' cana', caora na' uditzoga' žiba' lao ángel na', ben' blu'e në'ëdi' cana', ta tzionla'adya' lëbë'. ⁹Caora na' unë' në'ëdi' cani:

—Bihuelo' cana'. Nacaria' ben' rue mandado quie Diuzi cabë' luë', cabë' ben' bicho', ben' rguixogue' xti'idza' Diuzi, len yugulu ben' ruzënaga cabë' di'idza' zu lë'ë libro niga. Tuzi Diuzi reya'ala' tzionla'adyo'.

¹⁰Lëscan' unë' në'ëdi' caniga:

—Biucacho' con cabë' rna di'idza' zu lë'ë libro niga, como dan' baruen bago dza su di'idza' gaca con cabë' rnan lë'ë libro ni. ¹¹Psan quie ben' mala. Huegarajë' seguir huejë' cabë' tamala quiejë' ruejë'. Psan quie ben' rue tabayatza. Huegarajë' seguir huejë' cabë' tabayatza quiejë' ruejë'. Pero ben' rue tahuen, huegarajë' seguir huejë' tahuen. Lëscan' ben' naca la'iya, ben' quie Diuzi, huegarajë' seguir gaca la'iyarajë'.

Na'ra tatula una ángel tanun quie Cristo, unë' cani:

¹²—Tali na' baruen bago dza yeguida'. Huaguizuga' ja benë' cabë' naca ta bëjë'. ¹³Naca' ben' zu tuzioli. Lao na'a uzulaohua' ulëcha' yedyi layu. Lëscan' lao na'a yeyudyi yedu quie yedyi layu. Naca' ca quie letra A len letra Z quie abecedario.

¹⁴Huaca huen quie ben' rguibi žabe cuenda gata' derecho quiejë' ta gaojë' tažixi rbia yaga ru'e yela' neban. Cana' huazaque' tzu'ujë' lu'u ru'a puerta quie ciudad na'. ¹⁵Pero bisaque' tzu'u ja ben' birue quie Diuzi, bisaque' tzu'u ja ben' rue yela' brujo, bisaque' tzu'u ja ben' rdalë ja nigula binaca žgule, bisaque' tzu'u ja ben' ruti benë', bisaque' tzu'u ja ben' rionla'adyi' ja ídolo, bisaque' tzu'u ja ben' raxe rue huezi' yë'.

¹⁶—Në'ëdi', Jesús, aose'ela' ángel quia' ta quixogue'në' yugulu cabë'

unia' niga lao ja ben' nao xneza'.
Naca' ži'isuba rey David. Naca' ca
bélo raca titi' quie bala.

¹⁷Na'ra cani una Bichi Be quie
Diuzi len nigula utzagana'lë ben'
naca ca quie beco' ži'ila':

—Rbezando' yeguido', Señor Jesús.

Lëscana' cani una nu ben'
ruzënaga cabë' di'idza' zu lë'ë
guichi ni:

—Rbezando' yeguido', Señor Jesús.

Lëscan' huen guida nu ben' rbili
nisa, nu ben' re'en guida yo'o nisa
ta ru'e yela' neban. Biquižuga'jë' ta
yo'ojë'n.

¹⁸Na'ra inia' le'e, ben' ruzënaga
cabë' di'idza' zu lë'ë libro ni: Chi
utza' benë' di'idza' ni, huejë'n

di'idza' falso, hue Diuzi lëjë' ja
castigo cabë' rguixogue'n lë'ë libro
niga. ¹⁹Lëscan' chi užëchi'jë' con
cabë' rna di'idza' zu lë'ë libro niga,
bihue' Diuzi lato si'jë' parte quiejë'
quie yaga ru'e yela' neban. Lëscan'
bihue'në' lato tzu'ujë' lu'u ciudad
naca la'iya cabë' rguixogue'n lë'ë
libro niga.

²⁰Na'ra Jesús, ben' naca testigo
quie di'idza' zu lë'ë libro niga,
unanë' cani:

—Baruen bago dza yeguida'.

Na'ra në'ëdi', Juan, rnia' cani:

—Gaca cana'. iRbezando' yeguido',
Señor Jesús!

²¹Rulidza' Señor quiero Jesucristo
ta huela'iyane' le'e yugulule. Amén.